

華陽國志

冊二



華陽國志卷第六

劉先主志

先主諱備字玄德涿郡涿縣人漢景帝中山靖王勝後也勝子真元狩六年封涿縣陸城亭侯因家焉祖父雄察孝廉爲東郡范令父弘
先主幼孤與母販履織席自業舍東南角籬上有桑樹生高五丈餘遙望童童如車蓋人皆異之或謂當出貴人先主少時與宗中諸兒戲於樹下言吾必乘此羽葆蓋車叔父子敬謂曰汝勿妄言滅吾門也年十五母遣行學與宗人劉德然遼西公孫瓚俱事故九江太守同郡盧子幹德然父元起常資給先主與德然等元起妻曰各自一家何能常爾起曰宗中有此兒非常人也而瓚深與先主善瓚年長先主兄事之喜狗馬音樂美衣服長七尺五寸垂臂下膝顧自見耳能下人喜怒不形於色善交結豪俠年少爭附之中山大商張世平蘇雙等見而奇之多與之金先主由是得合徒衆河東關羽雲

長同郡張飛益德並以壯烈爲禦侮先主與二子寢則同牀食則共器恩若弟兄然於稠人廣衆中侍立終日

中平元年從校尉鄒

靖討黃巾賊有功除安喜尉求謁督郵不得乃入縛執之杖二百以綬繫督郵頭頸著馬柳柱委官亡命頃之應大將軍何進募有功除下密丞復爲高唐尉遷爲令瓚爲中郎將表先主爲別部司馬拒冀州牧袁紹數有戰功守平原令進領平原相郡民劉平恥爲之下使客刺之客服其德告之而去北海相魯國孔融爲黃巾賊所圍使太史慈求救於先主先主曰孔文舉聞天下有劉備乎以兵救之廣陵太守下邳陳登元龍太尉球孫也有雋才輕天下士謂功曹陳矯曰閨門雍穆有德有行吾敬陳元方父子冰清玉潔有德有言吾敬華子魚博聞強志奇偉卓犖吾敬孔文舉雄姿傑出有王霸之略吾敬劉玄德各器盡此

徐州牧陶謙表先主爲豫州刺史

徐州

牧陶謙病篤謂別駕東海糜竺曰非劉備不能安此州也謙卒竺率

州迎先主先主未許廣陵太守下邳陳登進曰今漢室陵遲海內傾覆立功立事在當有於字見三國志今日鄙州殷富戶口百萬欲屈使君撫臨

州事先主曰袁公路近在壽春此君四世五公海內所歸可以州與之登曰公路驕豪非治亂之主今欲爲使君合步騎十萬上可以匡濟生民成五霸之業下可以割地守境書功於竹帛若使君不見聽許登亦未敢聽使君也北海相孔融謂先主曰袁術豈憂國忘家者耶冢中枯骨何足介意今日之事百姓與能天與不取悔不可追先

主遂領徐州牧

建安元年曹公表爲鎮東將軍封宜城亭侯先

主與袁術相拒而下邳守將曹豹叛爲呂布所敗先主失妻子轉軍海西麋竺進妹爲夫人及客奴二千金銀寶貨資之先主因而獲振連合於布布還其妻子先主衆萬餘移軍小沛布惡之自攻先主先主歸曹公公以爲豫州牧益其軍使伐布失利布將高順復虜先主妻子送布公使夏侯惇助先主不能克

三年公自征布生禽之

布曰使布爲明公將騎天下不足定也公有疑色先主曰公待布能如丁建陽董太師乎公頷之布曰先主曰大耳兒最叵信者也遂殺布

先主還得妻子從公還許爲左將軍公禮之甚重出則同與坐則同席又拜關羽張飛皆中郎將公謀臣程昱郭嘉勸公殺先主

公慮失英豪望不許袁術自淮南欲經徐州北就袁紹按此下當脫公

遣先主要擊術云云獻帝舅車騎將軍董承受帝衣帶中密詔當殺公承先與

先主及長水校尉种輯將軍吳子蘭王子服等同謀以將行未發公

從容謂先主曰天下英雄惟使君與操本初之徒不足數也先主方

食失匕箸會天震雷先主曰聖人言迅雷風烈必變良有以也一震

之威乃至於此也公亦悔失言先主還沛解按沛字不當有解即今之廩字也公使

覘之見其方披葱使廝人爲之不端正舉杖擊之公曰大耳翁未之

覺也其夜先主急東行昱嘉復言之公馳使追之不及先主遂殺徐

州刺史車胄以叛留關羽行下邳太守事身還小沛而承等謀洩受

誅以先主衆數萬遣從事北海孫乾自結於袁紹公遣將軍劉岱

王忠擊之不克東五年公東征先主先主敗績妻子及關羽見獲

先主奔青州刺史袁譚奉迎道路馳以白父紹紹身出鄴二百里與

先主相見公壯羽勇銳拜偏將軍初羽隨先主從公圍呂布於濮陽

時秦宜祿爲布求救於張楊羽啓公妻無子下城乞納宜祿妻公許

之及至城門復白公疑其有色自納之後先主與公獵羽欲於獵中

殺公先主爲天下惜不聽故羽常懷懼公察其神不安使將軍張遼

以情問之羽歎曰吾極知曹公待我厚然吾受劉將軍恩誓以共死

不可背之當有要當二字立効以報曹公公聞而義之夫是歲紹征官渡

遣裨將顏良攻東郡太守劉延於白馬公使遼羽爲先鋒羽望見良

麾蓋策馬刺良於萬衆中斬其首還紹將莫敵遂解延圍公卽表封

羽漢壽亭侯重加賞賜當有羽字盡封其物拜書告辭而歸先主左右欲

追之公曰彼各有主先主說紹南連荊州牧劉表紹遣將其本

兵至汝南公使將蔡楊擊之先主謂曰吾勢雖不便汝等百萬來末如吾何曹孟德單車來吾自去楊等必戰爲先主所殺 公既破

紹自南征汝南先主遣麋竺孫乾詣劉表表郊迎之待以上賓使屯新野潁川徐元直致瑯琊諸葛亮曰孔明臥龍也將軍願見之乎先主曰君與俱來庶曰此人可就見不可屈致也先主遂造亮凡三因屏人曰漢室傾頹奸臣竊命主上蒙塵孤不度德量力欲信大義於天下而智術淺短遂用猖蹶至於今日志猶未已君謂計將安出亮對曰自董卓以來豪傑並起跨州連郡不可勝數曹操比於袁紹則名微而衆寡然遂能克紹以弱爲強雖云天時抑人謀也今操已擁百萬之衆挾天子而令諸侯此誠不可與爭也孫權據有江東已歷三世國險而民附賢能爲之用此可以爲援而不可圖也荊州北據漢沔利盡南海東連吳會西通巴蜀此用武之國而其主不能殆天所以資將軍也益州險塞沃野當有千里二天府之土高祖因之以

成帝業劉璋闇弱張魯在北國富民殷而不知卹賢能之士思得明君將軍既帝室之胄信義著於四海總攬英雄思賢如渴若跨有荆益保其險阻西和諸戎南撫夷越結好孫權內修政理天下有變命一上將將荊州之軍以向宛洛將軍身率益州之衆出於秦川天下孰不簞食壺漿以迎將軍者乎如此則霸業可成漢室可興矣先主曰善與亮情好日密自以爲猶魚得水也

十三年表卒少子琮

襲位曹公南征琮遣使請降先主屯樊不知曹公卒至至宛先主乃知遂將其衆去比到當陽衆十餘萬人車數千兩日行十餘里別遣關羽乘船會江陵或謂先主曰宜速行雖擁大衆被甲者少曹公軍至何以禦之先主曰夫濟大事以人爲本今人歸吾何忍棄之

公以江陵有軍實恐先主據之乃釋輜重以輕騎五千追先主一日一夜行三百里及於當陽之長坂先主棄妻子與諸葛亮張飛等數十騎走公盡獲其民衆急追先主張飛據水斷橋橫馬按矛曰我張

益德也可來決死公徒乃止

先主斜趣漢津適與羽船會而趙

雲身抱先主弱子後主及擁先主甘夫人相及濟江亮曰事急矣請奉命求救於孫將軍時權軍柴桑既服先主大名又悅亮奇雅卽遣周瑜程普水軍二萬助先主拒曹公大破公軍於赤壁焚其舫舟公引軍北歸先主以劉表長子江夏太守琦爲荊州刺史先主南平四郡武陵太守金旋長沙太守韓玄桂陽太守趙範零陵太守劉度皆降廬江雷緒率部曲數萬口稽顙琦病死先主領荊州牧治公安孫權進妹恩好綢繆以亮爲軍師中郎將督南二郡事以關羽爲盪寇將軍領襄陽太守住江北張飛爲征虜將軍宜都太守

初先主之敗東走也徑往鄂無土地關羽責之曰早從獵中言無今日先主曰安知此不爲福也及得荊州復有人衆孫權遣使

求共伐蜀又曰雅願以隆成爲一家諸葛孔明母兄在吳可令相并主簿殷觀曰若爲吳先驅大事去矣今但可贊之言新據諸郡未可

以動彼必不越我而有蜀也先主乃報曰益州不明得罪左右庶幾將軍高義上匡漢朝下輔宗室若必尋干戈備將放髮於山林未敢聞命權果輟計遷觀別駕

入益州

建安十九年先主克蜀蜀中豐富盛樂置酒大會饗食

三軍取蜀城中民金銀頒賜將士還其穀帛賜諸葛亮法正關羽張飛金五百斤銀千斤錢五千萬錦段萬匹其餘各有差以亮爲軍師將軍署左將軍府事正揚武將軍蜀郡太守關羽督荊州事張飛爲巴西太守馬超平西將軍不用許靖法正說曰有獲虛譽而無實者靖也然其浮名稱播海內人將謂公輕士乃以爲長史龐羲爲司馬李嚴爲犍爲太守費觀爲巴郡太守徵益州太守南郡董和當有字軍中郎當有將巴郡三字將句絕見三國志王謀在劉璋時爲巴郡太守見陳壽季漢輔臣讚注太守漢嘉王謀爲別駕廣漢彭蒙爲治中辟零陵劉巴爲西曹掾廣漢長黃權爲偏將軍於是亮爲股肱正爲謀主羽飛超爲爪牙靖羲及麋竺簡雍孫

乾山陽伊籍為賓友和嚴權本劉璋所授用也吳懿費觀璋之婚親也彭叢璋所排擯也劉巴所宿恨也皆處之顯位盡其器能有志之士無不競勸

羣下勸先主納劉瑁妻先主嫌其同族法正曰論其親疎何與晉文之於子圉乎從之正既臨郡睚眦之怨一澆之惠

無不報復或謂諸葛亮曰法正蜀郡太縱橫將軍宜啓主公亮曰有當

字公之在公安也北畏曹操之強東憚孫權之逼內慮孫夫人興變

於肘腋之下孝直為輔翼遂翻飛翺翔不可復制如何禁法使不得

行其志也孫夫人才捷剛猛有諸兄風侍婢百人皆仗劍侍立先主

每下車心常凜凜正勸先主還之 二十年孫權使報先主欲得

荊州先主報曰吾方圖涼州涼州定以荊州相與孫權怒遣呂蒙襲

奪長沙零陵桂陽三郡先主下公安令關羽下益陽會曹公入漢中

張魯走巴西黃權進曰若失漢中則三巴不振此割蜀人股臂也於

是先主與吳連和分荊州江夏長沙桂陽東屬南郡零陵武陵西屬

引軍還江夏以權爲護軍迎魯魯已北降曹公權破公所署三巴太守杜濩朴胡袁約等公留征西將軍夏侯淵益州刺史趙顥及張郃守漢中公東還郃數犯掠巴界先主率張飛等進軍宕渠之蒙頭拒郃相持五十餘日飛從他道邀郃戰於陽石遂大破郃軍郃失馬緣山獨與麾下十餘人從閒道還南也

二十一年先主還成都

二十二年蜀郡太守法正進曰曹操一舉降張魯定漢中不因此勢以圖巴蜀而留淵郃身遽北還非智不逮力不足將內有憂逼耳今算淵郃才略不勝吾將率舉衆往討則必可擒天以與我時不可失也先主從之以問儒林校尉巴西周羣羣對曰當得其地不得其民若出偏軍必不利先主遂行諸葛亮居守足食足兵也

二十

三年先主急書發兵軍師亮以問從事犍爲楊洪洪對曰漢中蜀之咽喉存亡之機若無漢中則無蜀矣此家門之禍男子當戰女子當運發兵何疑亮以法正從行白先主以洪領蜀郡太守後遂卽真初

洪爲犍爲太守李巖功曹去郡數年已爲蜀郡巖故在職而蜀郡何祇爲洪門下書佐去郡數年已爲廣漢太守洪故在官是以西土咸服亮之能攬拔英秀也後洪祇俱會亮門下洪謂祇曰君馬何駛祇對曰故吏馬不爲駛明府馬不進耳

二十四年先主定漢中斬夏侯淵張郃率吏民內徙先主遣將吳蘭雷同入武都皆沒乃舉羣茂才時州後部司馬張裕亦知占術坐漏言言先主得蜀寅卯之間當失漢凶年在庚子誅曹公爲魏王王西征聞法正策曰固知

玄德不辨此又曰吾收奸雄略盡獨不得正邪羣下上先主爲

漢中王大司馬以許靖爲太傅法正爲尙書令零陵賴恭爲太常南陽黃權爲光祿勳王謀爲少府武陵廖立爲侍中關羽爲前將軍張飛爲右將軍馬超爲左將軍皆假節鉞又以黃忠爲後將軍趙雲翊軍將軍其餘各進官號軍師諸葛亮曰黃忠名望本非關張馬超之倫也今張馬在近親見其功猶可喻指關遙聞之恐必不悅先主曰

吾自解之 時關羽自江陵圍曹仁於樊城遣前部司馬捷爲費

詩拜假節羽怒曰大丈夫終不與老兵同列不肯受拜詩謂曰昔蕭

曹與高祖幼舊陳韓亡命後至論其班爵韓最居上未聞蕭曹以此

爲怨今王以一時之功隆崇於漢升舊校云黃忠字也意之輕重寧當與君

侯齊乎王與君侯譬猶一體禍福同之愚謂君侯不宜計官號之高

下爵位之多少也羽卽受拜初羽聞馬超來降素非知故書與諸葛

亮問其人材亮知羽忌前答曰孟起黔彭之徒一世之桀當與益德

並驅爭先猶不如髯之絕倫也羽省書忻悅以示賓客羽美鬢髭故

亮稱云髯也羽臂嘗中流矢每天陰疼痛醫言矢鋒有毒須破臂刮

毒患乃可除羽卽伸臂使治時適會客臂血流離盈於盤器而羽引

酒割炙言笑自若 魏王遣左將軍于禁督七軍三萬人救樊漢

水暴長皆爲羽所獲又殺魏將龐德威震華夏魏王議徙許都以避

其銳而孫權襲江陵將軍傅士仁南郡太守麋芳降吳羽久不拔城

魏右將軍徐晃救樊羽退還遂爲孫權所殺吳盡取荊州以劉璋爲益州牧住姊歸 是歲尙書令法正卒諡曰翼侯以尙書劉巴爲

尙書令 二十五年春正月魏武王薨嗣王丕卽位改元延康蜀

傳聞漢帝見害先主乃發喪制服追諡曰孝愍皇帝所在並言衆瑞

故議郎陽泉亭侯劉豹青衣侯向舉偏將軍張裔黃權當有大字見三國志司

馬屬陰純別駕趙祚治中楊洪從事祭酒何宗議曹從事杜瓊勸學

從事張爽尹默譙周等上河洛符驗孔子所甄赤三日德昌九世會

備合爲帝際洛書寶號命曰天度帝道備稱皇又言周羣父未亡時

數言西南有黃氣立數十丈而景雲祥風從璇璣下來應之如圖書

必有天子出方今大王應際而生與神合契願速卽洪業以寧海內

先主未許冬魏王丕卽皇帝位改元黃初漢獻帝遜位爲山陽公

章武元年魏黃初二年也春太傅許靖安漢將軍麋竺軍師將軍

諸葛亮太常賴恭光祿勳黃權少府王謀等乃勸先主紹漢絕統卽

帝號先主不許亮進曰昔吳漢耿弇等勸世祖世祖辭讓耿純進曰天下英雄喁喁冀有所望若不從議者士大夫各歸其主無從公也世祖感之今曹氏篡漢天下無主大王紹世而起乃其宜也士大夫隨大王久勤苦者亦欲望尺寸之功如純言耳先主乃從之亮與博士許慈議郎孟光建立禮儀擇令辰費詩上疏曰殿下以曹操父子逼主篡位故乃羈旅萬里糾合士衆將以討賊今大敵未克而先自立恐人疑惑昔高祖與楚約先破秦者王及屠咸陽獲子嬰猶推讓況今殿下未出門便欲自立愚臣誠不爲殿下取也朝廷左遷詩部永昌從事

夏四月丙午先主卽帝位大赦改元章武以諸葛亮爲丞相假節錄尚書許靖爲右司徒張飛車騎將軍領司隸校尉進封西鄉侯馬超驃騎將軍領涼州刺史封縻鄉侯北督臨沮偏將軍吳懿爲關中都督進魏延鎮北將軍李嚴輔漢將軍襄陽馬良爲侍中楊儀爲尚書蜀郡何宗爲鴻臚立宗廟祫祭高皇帝世祖光武皇

帝 五月辛巳立皇后吳氏吳懿妹劉璋兄瑁妻也子禪爲皇太子
子 六月立子永爲魯王理爲梁王 先主將東征以復關羽

之恥命張飛率巴西萬兵將會江州飛帳下將張達范疆殺飛持其

首奔吳初飛勇冠三軍當有脫俱稱萬人之敵羽善待小人而驕士大

夫飛愛敬君子而不卹小人是以致敗先主常戒之曰卿刑殺過差

鞭撻健兒令在左右此取禍之道飛不悟故敗先主聞飛營軍都督

之有表也曰噫飛死矣命丞相亮領司隸校尉 秋七月先主東

伐羣臣多諫不納廣漢秦宓上陳天時必無其利先主怒繫之於理

孫權送書請和先主不聽吳將陸議李異劉阿等軍至姊歸左

右領軍南郡馮習陳留吳班自建平攻破異等軍次姊歸武陵五溪

蠻夷遣使請兵 二年春正月先主軍姊歸吳班陳戒等水軍屯

夷陵夾江東西岸 二月將進黃權諫曰吳人悍戰而水軍泝流

進易退難臣請爲先驅以嘗寇陛下宜爲後鎮先主不從以權爲鎮

北將軍督江北軍先主連營稍前軍於夷道猊亭遣侍中馬良經佷山安慰五溪蠻夷

夏六月黃氣見自姊歸十餘里中廣十餘丈

後十數日與吳人戰先主敗績馮習及將張南皆死先主歎曰吾之敗天也委舟舫由步道還魚復將軍義陽傅彤爲後殿兵衆死盡彤氣益烈吳將喻令降彤罵曰吳狗何有漢將軍降者遂戰死從事祭酒程畿獨沂江退衆曰後追以至宜解舫輕行畿曰吾在軍未習爲敵之走況從天子乎亦見殺

黃權偏軍孤絕遂北降魏李異劉

阿等踵躡先主屯南山

先主改魚復曰永安丞相亮聞而歎曰

法孝直若在則能制主上使不東行既復東行必不顛危矣

月司徒靖卒

是歲驃騎將軍馬超亦卒臨沒上疏曰臣宗門二

百餘口爲孟德所誅略盡唯從弟岱當爲微宗血食之係深託陛下

岱官至平北將軍拜彤子儉左右

當作中

郎將

冬十月詔丞相亮

營南北郊於成都孫權聞先主在白帝甚懼遣使請和先主使太中

大夫南陽宗瑋報命

十有一月先主寢疾十有二月漢嘉太守

黃元素亮所不善聞先主疾病慮有後患舉郡拒守

三年春正

月召丞相亮於成都詔亮省疾於永安元燒臨邛城治中從事楊洪

啓太子遣將軍陳習鄭綽由青衣水伐元滅之

二月亮至永安

先主謂曰君才十倍曹丕必能安國終定大事若嗣子可輔輔之如其不才君可自取亮涕泣對曰臣敢竭股肱之力效忠貞之節繼之以死先主又爲詔勅太子曰汝與丞相從事事之如父亮與尙書令李巖並受寄託

夏四月先主殂於永安宮時年六十二亮表後

主曰大行皇帝邁仁樹德覆育無彊昊天不弔今月二十四日奄忽升遐臣妾號咷如喪考妣乃顧遺詔事惟太宗百寮發哀三日除服到葬復服其郡國守相令長丞尉三日除服五月梓宮至成都謚曰昭烈皇帝秋八月葬惠陵

譏曰漢末大亂雄桀並起若董卓呂布二袁韓馬張楊劉表之徒兼

州連郡衆踰萬計叱咤之間皆自謂漢祖可踵桓文易邁而魏武神武幹略戡屠盪盡於時先主名微人鮮而能龍興鳳舉伯豫君徐假翼荆楚翻飛梁益之地克胤漢祚而吳魏與之鼎峙非英才命世孰克如之然必以曹氏替漢宜扶信順以明至公還乎名號爲義士所非及其寄死託孤於諸葛亮而心神無貳陳子以爲君臣之至公古今之盛軌也

華陽國志卷第六

華陽國志卷第七

劉後主志

後主諱禪字公嗣先主太子甘夫人所生也襲位時年十七
興元年夏五月後主卽位尊皇后吳氏曰皇太后大赦改元於魏黃
初四年吳黃武二年也立皇后張氏車騎將軍飛女也封丞相

亮武鄉侯中護軍李嚴假節加光祿勳封都鄉侯督永安事中軍師
衛尉魯國劉琰亦都鄉侯中護軍趙雲江州都督費觀屯騎校尉丞
相長史王連中部督襄陽向寵及魏延吳懿皆封都亭侯楊洪王謀
等關內侯南中諸郡並叛亂亮以新遭大喪未便加兵遣尙書

南陽鄧芝固好於吳吳主孫權曰吾誠願與蜀和親但主幼國小慮
不自存芝對曰吳蜀二國之地吳有三江之阻蜀有重險之固大王
命世之英諸葛一時之桀合此二長共爲唇齒進可兼并天下退可
鼎足而峙大王如臣服於魏魏則上望大王入朝其次求太子入侍

若其不從則奉辭伐叛蜀必順流見可而進如此江南之地非復大
王之有也吳主大悅與蜀和報使聘歲通芝後累往權曰若滅魏之
後二主分治不亦樂乎芝對曰滅魏之後大王未深識天命者戰爭
方始耳權曰君之誠懇乃至於此書與亮曰丁宏揆張陰化不實和
合二國惟有鄧芝
二年丞相亮開府領益州牧事無巨細咸決
於亮亮乃撫百姓示儀軌約官職從權制盡忠益時者雖仇必賞犯
法怠慢者雖親必罰服罪輸情者雖重必釋遊辭巧飾者雖輕必戮
善無微而不賞惡無纖而不貶庶事精練物究其本循名責實虛僞
不齒終乎封域之內畏而愛之刑政雖峻而無怨者以其用心平勸
戒明也
辟尚書郎蔣琬及廣漢李邵巴西馬勳爲掾南陽宗預
爲主簿皆德舉也秦宓爲別駕犍爲五梁爲功曹梓潼杜微爲主簿
皆州俊彥也而江夏費禕南郡董允郭攸之始爲侍郎贊揚日月

吳遣中郎將張溫來聘報鄧芝也將返命百官餞焉惟秦宓未往

亮累催之温問曰彼何人也亮曰益州學士也及至温問宓曰君學乎答曰五尺童子皆學何況小人温曰天有頭乎在何方也宓曰詩云乃眷西顧知其在西又曰天有耳乎宓曰詩不云乎鶴鳴九臯聲聞于天若無其耳何以聽之又曰天有足乎曰詩不云乎天步艱難之子不猶若其無足何以步之又曰天有姓乎曰姓劉何以知之曰其子姓劉又曰日生於東乎曰雖生於東終沒於西答問如響之應聲温大敬服宓亦尋遷右中郎將長水校尉大司農

三年春長

水校尉廖立坐謗訕朝廷改徙汶山立自荊州與龐統並見知而性傲侮後更冗散怨望故致黜廢

三月亮南征四郡以弘農太守

秋南

楊儀爲參軍從行步兵校尉襄陽向朗爲長史統留府事

冬亮還至漢陽與魏降人李鴻相見

中平軍資所出國以富饒

說新城太守孟達委仰於亮無已亮方北圖欲招達爲外援謂參軍

蔣琬從事費詩曰歸當有書與子度相聞對曰孟達小子昔事振威

不忠後奉先帝背叛反覆之人何足與書亮不答詩數率意而言故
凌遲於世 十有二月亮至羣官皆道迎而亮命侍郎費禕參乘

禕官小年幼衆士於是莫不易觀 四年永安都護李嚴還督江

州城巴部大城以征西將軍汝南陳到督永安封亭侯 是歲魏

文帝崩明帝立 五年魏太和元年也春丞相亮將北伐上疏曰

今天下三分益州疲弊此誠危急存亡之秋也然侍衛之臣不懈於

內忠志之士忘身於外者咸追先帝之遇欲報之陛下也先帝以臣

謹慎故臨崩寄臣以大事受命以來夙夜憂歎故五月渡瀘深入不

毛今南方已定兵甲已足當帥獎三軍北平中原庶竭駑鈍攘除姦

凶克復漢室還於舊都此臣所以報先帝而忠於陛下願陛下託臣

以討賊興復不効則治臣之罪以告先帝之靈陛下亦宜自謀諮諏

善道察納雅言不宜引喻失誼以塞忠諫之路也又曰親賢臣遠小

人先漢所以興隆昵小人疎君子後漢所以傾覆侍中郭攸之費禕

侍郎董允先帝簡拔以遺陛下斟酌規益進盡忠言則其任也宮省之事悉以諮之必能裨補闕漏有所廣益也

以尚書南陽陳震為中書令治中張裔為留府長史與參軍蔣

當有琬字

公琰知居府事

二月亮出屯漢中營沔北陽平石馬以鎮北將軍魏延為司馬

六年春丞相亮揚聲由斜谷道取郿使鎮東將軍趙雲中監軍鄧

芝據箕谷為疑軍魏大將軍曹真舉眾當之亮身率大眾攻祁山賞

罰肅而號令明天水南安安定三郡叛魏應亮關中響震魏明帝西

鎮長安命張郃拒亮亮使參軍襄陽馬謖裨將軍巴西王平及張休

李盛黃襲等在前違亮節度為郃所破平獨斂眾為殿而雲芝亦不

利亮拔將西縣千餘家還漢中戮謖及休盛以謝眾奪襲兵貶雲秩

長史向朗以不時臧否免罷超遷平參軍進位討寇將軍封亭侯統

軍五年

按當衍軍字年當作部三國志平傳云加拜參軍統五部兼當營事進位討寇將軍封亭侯可證也五部裴松之無注據

南中志言移南中勁卒青羌萬餘家於蜀為五部然則平所統者即此五部矣亮上疏曰臣以弱才叨竊非

據親秉旄鉞以厲三軍不能訓章明法臨事而懼至有街亭違令之闕箕谷不戒之失咎皆在臣臣授任無方春秋責帥職臣是當請自貶二等以督厥咎於是亮爲右將軍行丞相事辟天水姜維爲倉曹掾加奉義將軍封當陽亭侯亮書與長史張裔參軍蔣琬稱維曰姜伯約西州上士馬季常李永南不如也

冬亮復出散關圍陳

倉糧盡還魏將王雙追亮亮合戰斬雙

七年春丞相亮遣護軍

陳式攻武都陰平魏雍州刺史郭淮出將擊式亮自至建威淮退遂平二郡

後主詔策亮曰街亭之敗咎由馬謖而君引愆深自抑

損重違君意聽順所守前年耀師馘斬王雙今歲爰征郭淮遂走降集氏羌興復二郡威震凶暴功勳赫然復君丞相君其無辭

夏

四月吳主孫權稱尊遣衛尉陳震慶問吳與蜀約分天下

冬城

漢樂

八年春丞相亮以參軍楊儀爲長史加綏遠將軍遷姜維

護軍征西將軍

秋魏大將軍司馬宣王由西城征西車騎將軍

張郃由子午大司馬曹真由斜谷三道將攻漢中丞相亮軍成固表
進江州都護李嚴驃騎將軍將二萬人赴漢中嚴初求以五郡爲巴
州書告亮言魏大臣陳羣司馬懿並開府亮乃加嚴中都護以嚴子
豐爲江州都督大雨道絕真等還丞相亮以當西當作北征因留嚴
漢中署留府事嚴改名平 丞相司馬魏延將軍吳懿西入羌中

大破魏後將軍費曜雍州刺史郭淮於陽溪延遷前軍師鎮西將軍
封南鄭侯懿左將軍高陽鄉侯徙魯王永爲甘陵王梁王理爲安平
王皆以魯梁在吳分故也 九年春丞相亮復出圍祁山始以木

牛運參軍王平守南圍司馬宣王拒亮張郃拒平亮慮糧運不繼設
三策告都護李平曰上計斷其後道中計與之持久下計還住黃土
時宣王等糧亦盡盛夏雨水平恐漕運不給書白亮宜振旅 夏
六月亮承平指引退張郃至青封交戰爲亮所殺 秋八月亮還

漢中平懼亮以運不辨見責欲殺督運領岑述驚問亮何故來還又

表後主言亮僞退亮怒表廢平爲民徙梓潼奪平子豐兵以爲從事
中郎與長史蔣琬共知居府事時費禕爲司馬也 十年春丞相

亮休士勸農車騎將軍劉琰與軍師魏延不和還成都秋旱亮練兵
講武 十一年魏青龍元年也丞相亮治斜谷閣運糧谷口

十二年春丞相亮以流馬運從斜谷道出武功據五丈原與司馬宣
王對於渭南亮每患糧不繼使志不伸乃分兵屯田爲久住之基耕
者雜於渭濱居民之間百姓安堵軍無私焉 秋八月亮疾病卒

於軍時年五十四還葬漢中定軍山塚足容棺斂以時服諡曰忠武
侯鎮西大將軍魏延與長史楊儀素不和亮旣恃延勇猛又惜儀籌
畫不能偏有所廢常恨恨之爲作甘戚論二子不感延常舉刃擬儀
儀涕淚交流惟護軍費禕和解中間終亮之世盡其器用儀欲案亮
成規將喪引退使延斷後姜維次之延怒舉軍先歸南鄭各相表反
留府長史蔣琬侍中董允保儀疑延延逆欲擊儀儀遣平北將軍馬

岱討滅延延自以武幹常求將數萬別行依韓信故事亮不許以亮爲怯及儀將退使費禕造延延曰公雖亡吾見在當率衆擊賊豈可以一人亡廢國家大事乎使禕報儀不可故欲討儀儀帥諸軍還成都大赦以吳懿爲車騎將軍假節督漢中事初亮密表後主以儀性狷狹若臣不幸可以蔣琬代臣於是以琬爲尙書令總統國事以儀爲中軍師司馬費禕爲後軍師征西姜維爲右監軍輔漢將軍鄧芝前軍師領兗州刺史張翼前領軍並典軍政 廖立在汶山聞亮卒垂泣曰吾終爲左袵矣李平亦發病死初立平爲亮所廢安奄沒齒常冀亮當自補復策後人不能故感憤焉 十三年拜尙書令

蔣琬爲大將軍領益州刺史以費禕爲尙書令時新喪元帥遠近危悚琬超登大位旣無戚容又無喜色衆望漸服侍郎董允兼虎賁中郎將統宿衛兵軍師楊儀自以年宦在琬前雖同爲參軍長史己常征伐勤苦更處琬下書當怨望謂費禕曰公亡際吾當舉衆降魏處

世寧當落度如此耶禕表其言廢徙漢嘉儀又上書激切遂行儀重
辟 吳以亮之卒也增巴丘守萬人蜀亦益白帝軍右中郎宗預

使吳吳主曰東之與西共為一家何以益白帝守預對曰東增巴丘
之戍蜀益白帝之兵俱事勢宜然不足以相問也 十四年夏四

月後主西巡至湔山當登當有觀字坂觀汶川之流 武都氏王符健

請降將軍張尉迎之過期不至大將軍琬憂之牙門將巴西張嶷曰
健求附款至必無返滯聞健弟狡不能同功各將乖離是以稽耳健

弟果叛就魏健率四百家隨尉居廣都縣 十五年魏景初元年
也 夏六月皇后張氏薨諡曰敬哀 是歲車騎將軍吳懿卒

以後典軍安漢將軍王平領漢中太守代懿督漢中事 懿從弟

班漢大將軍何進官屬吳匡之子也各常亞懿官至驃騎將軍持節

鄉侯按當作假節縣竹侯見陳壽季漢輔臣贊注時南郡輔匡當作元弼零陵劉邕南和

官亦至鎮南將軍潁川袁綝南郡高翔至大將軍綝征西將軍

延熙元年春正月立皇后張氏敬哀皇后妹也大赦改元立子璿爲太子瑤爲安定王以典學從事巴西譙周爲太子家令梓潼李譔爲僕射皆名儒也 冬十二月大將軍琬出屯漢中更拜王平以前

護軍署大將軍府事尚書僕射李福爲前監軍領大將軍司馬

延熙當衍此二字二年春二月進大將軍琬大司馬開府辟治中從事犍

爲楊義當作義下同爲東曹掾義性簡琬與言時不應答羣吏以爲慢琬

曰夫人心不同各如其面面從後言古人所戒義欲贊吾是耶則非

本心欲反吾言也則顯吾之非是以嘿然此義之快也督農楊敏常

毀琬作事憤憤誠非前人也或以白琬琬曰吾信不如前人主者白

乞問憤憤狀琬曰苟其不如則憤憤矣復何問也後敏坐事下獄人

以爲必死琬心無適莫是以上下輯睦歸仰於琬蜀猶稱治 輔

漢將軍姜維領大司馬按此下當重有司馬二字三國志後主傳云延熙二年春三月進蔣琬位爲大司馬姜維

傳云琬既遷大司馬以維爲司馬然則維所領者蔣琬大司馬之司馬也傳寫者誤認爲複文而刪之耳是歲按此二字當在下文

魏明帝崩之上西征入羌中

魏明帝崩齊王卽位

延熙當衍此三字三

年魏正始元年也安南將軍馬忠率越巂太守張嶷平越巂郡

四年冬十月尙書令費禕至漢中與大司馬琬諮論事計歲盡還

五年春正月姜維還屯涪縣大司馬琬以丞相亮數入秦川不克

欲順沔東下征三郡朝臣咸以爲不可安南將軍馬忠自建寧還朝

因至漢中宣詔旨於琬琬亦連疾動輒計遷忠鎮南大將軍封彭鄉

侯六年大司馬琬上疏曰臣旣闇弱加嬰疾疹奉辭六年規方

無成夙夜憂慘今魏跨帶九州除之未易如東西犄角但當蠶食然

吳期二三連不克果輒與費禕馬忠議以爲涼州胡塞之要宜以姜

維爲涼州刺史銜持河右今涪水陸四通惟急是赴東北之便應之

不難冬十月琬還鎮涪以王平爲鎮北大將軍督漢中事姜維

鎮西大將軍涼州刺史十有一月大赦遷尙書令費禕大將軍

錄尙書事就遷江州都督鄧芝車騎將軍七年閏月魏大將軍

曹爽征西將軍夏侯玄征蜀王平白與護軍零陵劉敏距興勢圍以大司馬琬疾病假大將軍禕節率軍自成都赴漢中旌旗啓路馬人擐甲羽檄交馳嚴鼓將發光祿大夫義陽來敏求共圍棋禕留意博弈色守自若敏曰聊試君耳君信可人必能辨賊者也比至爽等退命鎮南將軍馬忠平尙書事

夏四月安平王卒子胤嗣

秋

九月禕還大司馬琬以病故讓州職於費禕董允於是禕加大將軍領益州刺史允加輔國將軍守尙書令允立朝正色處中上則匡主下帥羣司於時蜀人以諸葛亮蔣費及允爲四相一號四英宦人黃皓便僻佞慧畏允不敢爲非後主欲採擇允曰妃后之數不可過十二允嘗與軍典義陽胡濟大將軍禕共期遊宴命駕將出郎中襄陽董恢造允脩敬自以官卑少行求索去允曰本所以出者欲同與好遊談耳君以自屈方展闊積舍此就彼非所謂也命解驂止駕允之下士接物皆此類也君子以爲有周公之德

八年秋皇太后吳

氏薨諡曰穆

冬十有一月大將軍禕行軍漢中

九年夏六

月禕還成都

秋大赦司農孟光衆責禕曰夫赦者偏枯之物非

明世之所宜有也今主上賢仁百寮稱職有何旦夕之急數施非常

之恩以惠奸軌之惡上犯天時下違人理豈具瞻之高美所望於明

德哉禕但顧謝焉初丞相亮時有言公惜赦者亮答曰治世以大德

不以小惠故匡衡吳漢不願爲赦先帝亦言吾周旋陳元方鄭康成

閒每見啓告治亂之道備矣曾不語赦也若景升季玉父子歲歲赦

宥何益於治故亮時軍旅屢興不妄下也自亮沒後茲制遂虧

蜀初闕三司之位以待天下賢人其卿士皆勳德融茂太常杜瓊學

通行脩衛尉陳震忠惇篤粹孟光亮直著聞皆良幹也但光好指擿

利病大長秋南陽許慈普記舊校云闕性光祿來敏舉措不慎失勢事者

指當世美名不及特進太常廣漢譚承光祿勳河東裴雋也其朝臣

尚書巴西司學義陽胡博僕射巴西姚伯侍中汝南陳祗並讚事業

以故丞相長史向朗爲左將軍朗自去長史優遊無事乃鳩合
經籍開門誘士講論古義不預世務是以上自執事下及童冠莫不
宗敬焉 冬十有一月大司馬琬卒諡曰恭侯中書令董允亦卒
超遷蜀郡太守南陽呂乂爲尙書令進姜維爲衛將軍與大將軍禕
並錄尙書事維出隴西與魏將郭淮夏侯霸戰尅之 十年涼州

胡王白虎文治無戴等率衆降衛將軍維徙之繁縣 汶山平康

夷反維復討平之過見廖立意氣自若維還假節 十一年鎮北

將軍王平卒以中監軍胡濟爲驃騎將軍假節領兗州刺史代平督
漢中事平始出軍武不大知書性警朗有思理與馬忠並垂事績平
同郡勾扶亦果壯亞平官至右將軍封宕渠侯後張翼與襄陽廖化
並爲大將故時人爲語曰前有何勾後有張廖平本養外家何氏後
復姓 夏五月大將軍禕出屯漢中 十二年魏嘉平元年也

魏誅大將軍曹爽右將軍夏侯霸來降淵子也拜車騎將軍 四

月大赦 秋衛將軍維出雍州不克將軍勾安李韶降魏 十

三年衛將軍維復出西平不克而還 十五年吳主孫權薨子亮

立來告赴如古義也 立子琮為西河王 命大將軍禕開府

尚書令呂乂卒以侍中陳祗守尚書令加鎮軍將軍 十六

年春正月朔魏降人郭循因賀會手刃殺大將軍費禕於漢壽諡曰

敬侯禕當國各略與蔣琬比而任業相繼雖典戎於外慶賞刑威咸

咨於己承諸葛之成規因循不革故能邦家和壹自禕歿後闕宦秉

權衛將軍維自負才兼文武加練西方風俗謂自隴以西可制而有

禕常裁制至是無禕屢出師旅功績不立政刑失錯矣 四月維

將數萬攻南安魏雍州刺史陳泰掾之維糧盡還 十七年魏正

元元年也 春衛將軍維督中外軍事大赦 夏六月維復出

隴西魏狄道長李簡舉縣降維圍襄武魏大將徐質掾之維拔狄道

河間按胡三省通鑑注云當作關臨洮三縣民入蜀居於縣竹及繁 是歲魏

帝齊王廢高貴鄉公卽位

十八年春衛將軍維復議出征征西

大將軍張翼廷爭以小國不宜黷武維不聽

夏率車騎將軍夏

侯霸及翼出狄道大破魏雍州刺史王經於洮西經衆死數萬經退保狄道城翼曰可矣不宜進或毀此成功爲虵畫足維必進魏征西

將軍陳泰掾狄道維退駐鍾題

十九年魏甘露元年也

春

進衛將軍姜維爲大將軍

秋八月維復出天水至上邽鎮西大

將軍胡濟失期不至大爲魏將鄧艾所破死者衆士庶由是怨維而

隴以西亦無寧歲

冬維還謝過引負求自貶削於是以維爲後

將軍行大將軍事

立子攢爲新平王大赦

二十年春大赦

魏征東大將軍諸葛誕以淮南叛連吳魏分關中兵東下後將軍姜

維復從駱谷出長城軍芒水與魏大將軍司馬望鄧艾相持

景

耀元年維以誕破退還成都復拜大將軍

史官言景星見大赦

改元

宦人黃皓與尙書令陳祗相表裏始豫政皓自黃門丞至

今年為奉車騎尉中常侍 姜維雖班在祇右權任不如蜀人無

不追思董允者時兵車久駕百姓疲弊太中大夫譙周著仇國論言

可為文王難為漢祖人莫察焉 征北大將軍宗預自永安徵拜

鎮南當作軍見三國志將軍領兗州刺史以襄陽羅憲為鎮軍督永安事

吳大臣廢其主亮立孫休來告難如同盟也 大將軍維議以

為漢中錯守諸圍適可禦敵不獲大利不若退據漢樂二城積穀堅

壁聽敵入平且重關鎮守以禦大當作之句絕見三國志敵攻關不克野無散

穀千里懸糧自然疲退此殄敵之術也於是督漢中胡濟却守漢壽

監軍王含守樂城護軍蔣舒當作斌見三國志守漢城又於西安建威武衛

石門武城建昌臨遠皆立圍守 二年夏六月立子謹為北地王

恂為新興王虔為上黨王 以征西張翼為左車騎將軍領冀州

刺史廣武督廖化為右車騎將軍領并州刺史時南郡閻宇為右衛

大將軍 秋八月丙子領中護軍陳祗卒諡曰忠侯祗在朝上希

主指下接闔宦後主甚善焉以僕射南鄉侯董厥爲尙書令 三

年魏景初元年也 秋八月追諡故前將軍關羽曰壯繆侯車騎

將軍張飛曰桓侯驃騎將軍馬超曰威侯軍師龐統曰靖侯後將軍

黃忠曰剛侯 是歲魏帝高貴鄉公卒常道鄉公卽帝位 四

年春二月追諡故鎮軍趙雲曰順平侯 冬十月大赦拜丞相亮

子武鄉侯瞻中都護衛將軍遷董厥輔國大將軍與瞻輔政以待中

義陽樊建守尙書令自瞻厥用事黃皓秉權無能正矯者惟建特不

與皓和好往來而祕書令河南郗正與皓比屋周旋皓從微至著既

不憎正又不愛之官不過六百石常免於憂患 五年春正月西

河王琮卒 大將軍維惡皓之恣擅啓後主欲殺之後主曰皓趨

走小臣耳往者董允切齒吾常恨之君何足介意維本羈旅自託而

功效無稱見皓枝附葉連懼於失言遜辭而出後主勅皓詣維陳謝

維誘皓求沓中種麥以避內逼皓承白後主秋維出侯和爲魏將鄧

艾所破還駐沓中皓協比閣宇欲廢維樹宇故維懼不敢還 六

年春魏相國晉文王命征南當作西見三國志將軍鄧艾鎮西將軍鍾會雍

州刺史諸葛緒益州刺史師纂五道伐蜀大將軍姜維表後主求遣

左右車騎張翼廖化督諸軍分護陽安關口及陰平橋頭黃皓信巫

鬼謂敵不來啓後主寢其事羣臣不知 夏艾將入沓中會將向

駱谷蜀方聞之遣張翼董厥爲陽安關外助廖化爲維援繼大赦改

元炎興比至陰平聞諸葛緒向建威故待月餘維爲鄧艾所摧還陰

平 鍾會圍樂城遣別將攻關分將蔣舒開門降都督傅僉奮戰

而死 冬會以樂城不下徑長驅而前翼厥之至漢壽也維化捨

陰平還保劍閣拒會會不能尅糧運懸遠議欲還而鄧艾由陰平景

谷傍入後主又遣都護諸葛瞻督諸軍距艾至漢涪不進尙書郎黃

崇權子也勸瞻速行固險無令敵得入坪言至流涕瞻不從前鋒已

破艾徑至涪瞻退保緜竹艾書誘瞻曰若降者必表封瑯琊王瞻怒

殺艾使戰於縣竹瞻軍敗績瞻臨陣死崇及羽林督李球尙書張遵皆必死沒命瞻長子尙歎曰父子荷恩不早斬黃皓以至敗國殄民用生何爲乃驅馬赴魏軍而死 百姓聞艾入坪驚迸山野後主

會羣臣議欲南入七郡或欲奔吳光祿大夫譙周勸降魏魏必裂土封後主後主從之遣侍中張紹駙馬都尉鄧良齎璽綬奉牋詣艾降北地王謚恚憤殺妻子而後自殺 艾至成都後主輿櫬面縛銜

璧迎之艾親釋其縛受其璧焚其櫬承制拜驃騎將軍使止其宮執黃皓將殺之受賄而赦之諸圍守皆奉後主勅令乃下姜維未知後主降謂且固城素與執政者不平欲使其知衛敵之難而後逞志乃迴由巴西出鄴五城會被後主手令乃投戈釋甲詣鍾會降於涪軍士莫不奮激以刃斫石 明年春正月會構艾檻車見徵會圖異

計奇維雄勇還其節蓋本兵謂長史杜預曰姜伯約比中州名士夏侯太初諸葛公休不如也鄧艾亦謂蜀人曰姜維雄兒也會維則出

同車坐同席將至成都稱益州牧以叛恃維牙爪欲遣維爲前將軍
伐中國維既失策又知會志廣教會誅北諸將諸將既死徐欲殺會
盡坑魏兵還後主密書通後主曰願陛下忍數日之辱臣欲使社稷
危而復安日月幽而復明魏太后崩會命按通鑑考異引有諸字當補將發喪因
欲誅之諸將半入而南安太守胡烈等知其謀燒成都東門以襲殺
會及維張翼後主太子璿等軍衆抄掠數日乃定 三月後主舉

家東遷洛陽

丁亥封安樂縣公食邑萬戶賜絹萬匹奴婢百人

他物稱此弟兄子孫爲郡都尉侯者五十餘人以譙周全國濟民封
城陽亭侯祕書令郗正舍妻子隨侍後主相導威儀封關內侯於是
尚書令樊建殿中督張通侍中張紹亦封侯劉氏凡得蜀五十年正
稱尊號四十二年 蜀郡太守王崇論後主曰昔世祖內資神武
之大才外拔四屯按當作七東京賦授鉞四十七薛綜注四七二十八將也之奇將猶勤而獲濟
然乃登天衢車不輟駕坐不安席非淵明弘鑒則中興之業何容易

哉後主庸常之君雖有一亮之經緯內無骨附之謀外無爪牙之將
焉可包括天下也又曰鄧艾以疲兵二萬溢出江油姜維舉十萬之
師案道南歸艾爲成禽禽艾已訖復還拒會則蜀之存亡未可量也
乃迴道之巴遠至五城使艾輕進徑及成都兵分家滅己自招之然
以鍾會之知略稱爲子房姜維陷之莫至尅捷籌筭相應優劣惜哉
愚以爲維徒能謀一會不慮窮兵十萬難爲制御美意播越矣
譔曰諸葛亮雖資英霸之能而主非中興之器欲以區區之蜀假已
廢之命北吞強魏抗衡上國不亦難哉似宋襄求霸者乎然亮政脩
民理威武外振爰迄琬禕遵脩弗革攝乎大國之間以弱爲強猶可
自保姜維才非亮匹志繼洪軌民嫌其勞家國亦喪矣

華陽國志卷第七

每字數以辨用清韻其有與家國不...

...

...

...

...

...

...

...

...

...

...

華陽國志卷第八

大同志

古者國無大小必有記事之史表成著敗以明懲勸稽之前式州部宜然自劉氏祚替而金德當陽天下文明不及曩世逮以多故族祖武平府君漢嘉杜府君並作蜀後志書其大同及其喪亂然逮在李氏未相條貫又其始末有不詳第璩往在蜀櫛沐艱難備諳諸故事當作事故按事句絕讀故下屬也更敘次顯挺年號上以彰明德下以治違亂庶幾

萬分有益國史之廣識焉魏咸熙元年蜀破之明年也以東郡袁邵爲益州刺史隴西太守安平牽弘爲蜀郡金城太守天水楊欣爲犍爲太守 後主旣東遷內移蜀大臣宗預廖化及諸葛顯等并三

萬家於東及關中復二十年田租董厥樊建並爲相國參軍 冬

分州置梁州遣厥建兼散騎常侍使蜀慰勞 晉泰始元年春刺

史袁邵以治城將被徵故蜀侍郎蜀郡常忌詣相國府陳邵撫卹有

方遠國初附當以漸導化不宜改易州將失遐外心相國聽留辟忌
爲舍人 冬十月晉武帝踐祚 二年春武帝弘納梁益引援

方彥用故黃金督蜀郡柳隱爲西河巴郡文立爲濟陰太守常忌河
內縣令 四年故中軍士王富有罪逃匿密結亡命刑徒得數百

人自稱諸葛都護起臨邛轉侵江原江原方略吏李高閭術縛富送
州刺史童策斬之初諸葛瞻與鄧艾戰於緜竹也時身死失喪或言
生走深逃瞻親兵言富貌似瞻故富假之也 五年散騎常侍文

立表復假故蜀大臣名勳後五百家不預廝劇皆依故官號爲降

六年分益州南中建寧雲南永昌興古四郡爲寧州 七年汶

山守兵呂匡等殺其督將以叛族滅之初蜀以汶山西五郡北逼陰
平武都故於險要置守自汶山龍鶴冉駝白馬匡用五圍皆置脩屯
牙門晉初以禦夷徼因仍其守 八年三蜀地生毛如白毫二夕

長七八寸生數里 十年汶山白馬胡恣縱掠諸種夏刺史皇甫

晏表出討之別駕從事王紹等固諫不從典學從事蜀郡何旅諫曰
昔周宣王六月北伐者獫狁孔熾憂及諸夏故也今胡夷相殘戎虜
之常未爲大患而盛夏出軍水潦將降必有疾疫宜須秋冬圖之未
晚晏不聽遂西行軍城比人當有麋入營中軍占以爲不祥晏不悟
胡康水子燒香言軍出必敗晏以爲沮衆斬之夏五月軍至都

安屯觀坂上旅復諫曰今所安營地名觀坂上自當作觀下反上當作

卜之按自上觀下反卜象徵不吉昔漢祖悟柏人以免難岑彭惡彭

亡而不去遂陷於禍宜移營他所晏不納其言夜所將中州兵蔡雄
宣班張儀等以汶山道險心畏胡之強晏復諫干時衆庶所怨遂引
牙門張弘督張衡等反殺晏衆夜亂不知所爲惟兵曹從事犍爲楊
倉鸞弓力戰射百餘發且詈雄衆擊之矢盡見殺從事廣漢王紹亦
赴之死初晏未出蜀中傳相告曰井中有人學士靳普言客星入東
井東井益州之分野憂刺史戒客人耳又有猛風是逆風其日觀卦

用事若軍西行獲觀坂門人向天井益可慮也故旅勲諫云卒如其言弘等遂誣表晏欲率己共反故殺之求以免罪其衆抄掠百姓廣漢主簿李毅白太守弘農王濬宜急救益州禍亂保晏無惡必為弘等所枉害濬從之而晏主簿蜀郡何攀以母喪在家聞亂釋纓經詣洛訴晏忠孝而弘等惡逆事得分明詔書因以濬為益州刺史加輕車將軍濬斬弘等益州平

咸寧二年春刺史濬誅犍為民陳瑞

瑞初以鬼道惑民其道始用酒一斗魚一頭不奉他神貴鮮潔其死喪產乳者不百日不得至道治其為師者曰祭酒父母妻子之喪不得撫殯入弔及問乳病者轉奢靡作朱衣素帶朱幘進賢冠瑞自稱天師徒眾以千百數濬聞以為不孝誅瑞及祭酒袁旌等焚其傳舍益州民有奉瑞道者見官二千石長吏巴郡太守犍為唐定等皆免官或除名

蜀中山川神祠皆種松柏濬以為非禮皆廢壞燒除

取其松柏為舟船惟不毀禹王祠及漢武帝祠又禁民作巫祀於是

蜀無淫祀之俗教化大行有木連理嘉禾黃龍甘露之祥 二月

被詔罷屯田兵大作舟船爲伐吳調別駕何攀以爲佃兵但五六百人無所辦宜召諸休兵借諸郡武吏并萬餘人造作歲終可成濬從之攀又建議裁船入山動數百里艱難蜀民冢墓多種松柏宜什四市取入山者少濬令攀典舟船器仗 冬十月遣攀使詣洛表可

征伐狀因使至襄陽與征南將軍羊祜荊州刺史宗廷論進取計

四年春漢中都吏龔祚等謀殺太守姜宗以叛宗覺堅守祚等燒

南鄭市及平民屋族誅 刺史濬當遷大司農至漢壽重遣參軍

李毅詣洛與何攀並表求伐吳 五年詔書拜濬龍驤將軍假節

監梁益二州軍事除何攀郎中參軍事以典軍從事張任趙明李高

徐兆爲牙門姚顯郄堅爲督冬當大舉秋攀使在洛安東將軍王渾

表孫皓欲北侵請兵朝議征却須六年攀因表可因今取之策皓必

不自送帝乃許焉 冬十有二月濬因自成都帥水陸軍及梁州

三水胡七萬人伐吳臨發斬牙門將李延所愛侍將也以爭騎斬衆莫不肅至江州詔書進濬平東將軍都督二州巴東監軍唐彬及平南軍皆受指授別遣參軍李毅將軍由涪陵入取武陵會巴陵

太康元年春三月吳平攀毅以下功封各有差以淮南胡羆為益州刺史濬遷輔國將軍 初濬將征問靳普今行何如普對曰客星

伏南斗中而太白歲星在西方占曰東方之國破必如志矣普學術不貪榮華卒於布衣 三年更以益梁州為輕車當作州句絕按下文元康六年

復以梁益州為重州可證也刺史乘傳奏事以蜀多羌夷置西夷府以平吳軍司

張牧為校尉持節統兵州別立治西夷治蜀各置長史司馬 五

年罷寧州諸郡還益州置南夷校尉持節如西夷皆舉秀才廉良

八年武帝子成都王穎受封以蜀郡廣漢犍為汶山十萬戶為王

國易蜀郡太守號為成都內史 元康六年復以梁益州為重州

遷益州刺史栗鑿為梁州加材官將軍揚烈將軍趙廞為益州刺史

加折衝將軍

關中氐及馬蘭羌反寇天水略陽扶風始平武都

陰平發梁州及東羌鎮西討之不克益州遣牙門馬玄尹方救援之
以鹿車運成都米給軍糧

八年廡至州雖崇簡約而性實奢泰

略陽天水六郡民李特及弟庠閻式趙肅何巨李遠等及氐叟青叟
數萬家以郡土連年軍荒就穀入漢川詔書不聽入蜀益州勅關禁
之而戶曹李苾開關放入蜀布散梁州及三蜀界

汶山興樂縣

黃石北地盧水胡成豚堅安角成明石等與廣柔平康文降劉紫利
羌有讎遂與螻蛄羌邛逢等數千騎劫縣令求助討紫利太守楊邠
撻殺豚堅而降其餘類餘遂叛殺長吏

冬西夷校尉西平麴

炳表出軍遣牙門將孫眺爲督護萬人征之戰於常安大爲胡所破

九年炳以敗軍徵還晉

當衍

夏用江夏太守陳總爲代胡退

散

永康元年詔徵刺史廡爲大長秋遷成都內史中山耿滕爲

益州刺史折衝將軍因廡所服佩初廡以晉政衰而趙星黃占曰星

黃者王陰懷異計蜀土四塞可以自安乃傾倉賑施流民以收衆心以李特弟庠衛六郡人勇壯厚卹遇之流民恃此專爲劫盜蜀民患之滕數密表流民剛戇而蜀人懦弱客主不能相饒宜移還其本土不者與東三郡隘地觀其情態漸不可長將移秦雍之禍於梁益矣又言倉庫虛竭無以應鋒鏑之急必益聖朝西顧之憂由是廠惡滕州被詔書已遣文武士千餘人迎滕滕以廠未出州故在郡廠募庠黨羅安王利等劫滕大敗於廣漢宣化亭殺傳詔者滕議欲入州城功曹陳恂諫曰今州郡並治兵怨構日深入城必有大禍不如安住少城檄諸縣合村保以備秦氏陳西夷行至且觀其變不爾可退住犍爲西渡江原以防非常滕不從冬十有二月滕入城登西門廠遣親近代茂取滕茂告之而去廠又遣兵討滕滕軍敗績自投少城上吏左雄負滕子奇依民宋寧藏廠購千金寧不出廠尋敗得免郡吏皆竄走惟陳恂面縛詣廠請滕死喪廠義而不殺也恂與

戶曹掾常敞共備棺冢葬之 廠又遣軍逆陳總總至江陽聞廠

有異志主簿趙模進曰今州郡不協必生大變惟當速行府是兵要

助順討逆莫有動者也總更緣道遲留至南安魚涪津以與廠軍遇

模白總散財貨募士卒距戰若克州軍則州可得不克順流而退必

無害也總不能更曰趙益州忿耿侯故殺之與吾無嫌何為如此模

曰今州起事必當立威雖不戰無益也言至垂涕總不聽衆弛總逃

草中模衣總服格戰廠兵殺模見非總乃搜求總殺之廠自稱大當

都督大將軍益州牧以武陽令蜀郡杜淑別駕張粲巴西張龜西夷

司馬龔尼江原令犍為費遠等為左右長史司馬參軍徙犍為太守

李庠為威寇將軍召臨邛令涪陵許弇為牙門將召諸王官莫敢不

往又以廣漢太守張微後賢志及目錄皆作徵汶山太守楊邠成都令費立為

軍祭酒時庠與兄當有特字弟流驤妹婿李含天水任回上官晶扶風李

攀始平費他氏符成隗伯董勝等四千騎在北門廠使庠斷北道庠

素東羌良將曉軍陳不用麾志舉矛為行伍庠勸稱大號漢庠部下
放攬廠等忌之遂於會所斬庠及其兄子弘等十餘人慮特等為變
又命為督將安慰其軍還特庠喪其夜特流徹眾散歸縣竹廠遣故
陰平令張衡升遷費恕就綏納皆為特所殺 許弇求為巴東監

軍杜淑張粲逆不許弇怒於州閣下手刃殺淑粲即亦殺弇二子廠
腹心也 永寧元年春正月廠遣萬餘人斷北道次縣竹以長史

費遠為繼前軍宿石亭特等相合得七百餘人夜襲之因放火殺廠
軍略盡進當有成都城中恐懼中郎常美與費遠李苾張微等夜斬

關委廠走文武散盡廠獨與妻子乘小船順水至廣都為下人朱竺
所殺哀舊校云疑今按哀當衍舊校非也廠字和叔本巴西安漢人也祖世隨張魯

內移家趙趙王倫器之歷長安令天門武陵太守來臨州長子曷在
洛亦見誅 特流至成都殺西夷護軍姜發及龔尼相都令袁洽

因大抄掠遣牙門王角李基詣洛表狀初梁州刺史羅尚聞廠反表

廠非雄才又蜀人不願爲亂必無同者事終無成敗亡可計日而俟
惠帝因拜尙平西將軍假節領護西夷校尉益州刺史給衛節兵一
千梁州兵二千又配上庸都尉義部千五百人合四千五百人遷梓
潼太守樂陵徐儉爲蜀郡揚烈將軍隴西辛冉爲廣漢太守 羅

尙又表請牙門將王敦兵七千餘人入蜀特等聞尙來甚懼使弟驤
奉迎特厚進寶物尙以驤爲騎督特流奉牛酒勞尙於縣竹王敦說
尙曰特等隴上塞盜劫賊宜軍無後患也會所殺之辛冉本趙王倫
所用非資次召當還欲討廠以自新亦言之尙不納又冉謂特曰故
人相逢不吉當凶特自猜懼三月尙至州治汶山羌反於都安之天
拭山遣王敦討之殺數千人大沒女弱爲生口敦單馬馳爲羌所殺

缺特

御史馮該張昌攝秦雍州從事督移還流民徙者萬餘家而特

兄輔素留鄉里託言迎家卽至蜀因謂特曰中國亂不足還遣天水
閻式累詣尙求弛領校權停至秋並進貨賂於尙該許之及秋又求

至冬辛冉李苾以爲不可必欲移之式爲別駕杜弢說逼移利害弢亦欲寬迸民一年辛冉李苾以爲不可尙從之弢致秀才板出還家知計謀不行故也

時有白虹頭在井里尾在東山拖太城上治中從事巴西馬休問閻式曰此何祥也式曰占言下有万屍氣甚迫於城非佳應天孽可違乎平西若能寬迸民災自消矣冉苾又白尙流民前廡亂際多所枉沒宜因移設關以奪取

秋七月尙移書梓潼所在抱關

八月關皆城閣式曰無寇而城讎必保之蜀將亂矣

九月遣軍軍繇竹揚言種麥實備越逸冉又購特流首百匹特驤悉更其購云能送六郡大姓閻趙任楊李上官及氏叟梁竇符隗董費等首百匹流民本無還意大驚駭趣特

冬十月特流

乃保赤祖爲二營特稱鎮北益州流鎮東皆大將軍兄輔驃騎弟驤驍騎特長子蕩鎮軍少子雄前軍李含西夷校尉含子國離及任回上官晶李攀費他皆將軍以天水任臧上官惇楊褒楊發楊珪王達

麴歆陰平李遠武都李博略陽夕斌等參佐而閻式何巨趙肅亦爲
賓從其餘皆有官號辛冉遣護軍曾元攻之爲特所殺尙督護田佐
牙門劉並助冉復敗進圍廣漢尙復遣犍爲太守李苾長史費遠助
冉不能克冉託罪於縣竹令南郡岐苞斬之而潰圍走德陽特等得
廣漢詐爲表奏稱引梁統推舉竇融故事以自貴尙書檄告喻閻式
式答曰辛冉傾巧杜景狂發曾元小豎田佐血氣不治李叔平才經
廊廟無將帥之氣討羸之羌謂可長爾式前爲節下及杜景文論留
徙之宜人懷桑梓孰不願之但往初至隨穀庸賃一室五分復值雨
潦乞須冬熟而不見聽必窮鹿抵虎但恐繩之大過迸民不肯延頸
受刃其憂在後卽聽式言寬使治嚴不過去九月盡集十月坐進道
令達鄉里何有如此也雅聽未察卹彼過言今辛冉奴亡叔平長遯
支分勢解事漸及己所謂不寤曲突遠薪而有焦爛之客也尙率其
民盡渡鄆水以南尙阻長圍自都安至犍爲七百里捍特特等保廣

漢 太安元年春尚牙門夏匡攻李特於立石失利征西遣督護

衙博西征討特博次梓潼晉復拜前廣漢太守張微廣漢太守據德

陽 尚遣督護巴西張龜督四十牙門軍繁城博方遣參軍蒙紹

誘特降尚貽博書曰昔年得李流牋降心款款由時威帖得還爲寇

聞特委誠於下吏而流驤七八千人來寇日至姦凶之態詭譎不測

不可不重以持之也博不從故爲特所破於陽沔梓潼太守張演委

倉庫走巴西巴西按此複衍二字下文郡丞乃梓潼之郡丞不得重巴西也郡丞毛植五官襄班

舉郡降特 衙博才兼文武征西大將軍河閒王深器之初爲陰

平太守爲從事巴郡毛扶所免怨梁州人及西征征西許雄以陽沔

之役寇尚未至聞鶴鳴便退博欲委罪梁州託以自不供給梁州治

中表之博以是得罪晉乃更用許雄爲梁州刺史 八月特破德

陽流次成都北上李驤在毗橋尚遣將張興僞降於驤覘士衆還以

告尚尚遣叟兵襲驤破之流驤并衆攻尚軍軍失利喪其器甲

梁州刺史許雄數遣軍討特特備險不得進征西乃遣監軍劉沈將西征以中國有事不果而南夷校尉李毅遣叟兵助尙軍數挫特勢日盛

二年春正月朔特攻尙水上軍特從盜底渡黨徒從赤水渡入郾及水西南緣江守軍皆散走太守徐儉逼降尙保太城特營少城而流軍江西之檢上蜀民先已結村保特分人就主之雄書諫特收質任無得分散猛銳流亦諫之特怒曰大事以定但當安民何緣疑動而劫害不止尙從事蜀郡任叡說尙曰侵暴百姓又分人衆散在諸村怠沓無備殆天亡特之秋也可告諸村密剋戰日內外擊之破特必矣尙從之從維出叡使宣旨告諸村期二月十日同時討特手書隱語曰在彼楊水叡先詣特降究觀虛實特問城中叡曰米穀已欲盡但有貨帛耳因求省家特與啓信諸村悉從叡叡還報尙如期出軍討特諸村亦起大殺特衆

當重有特衆二字

破退追及於繁之官

桑斬特及兄輔

當有李字

遠等李流斂餘衆還赤祖尙乘勝但施遊軍征

邊傳特首洛陽焚其屍 李雄以李離為梓潼太守衆還赤祖推

流為大將軍大都督當有益州牧三字而荊州刺史宋當作宗下同岱水軍三萬

助尚次墊江前鋒建平太守孫阜破特德陽守將蹇碩太守任臧徑

至涪 三月尚遣督護張龜何冲左汜等軍繫城而緜竹降涪陵

民藥紳杜阿應尚尚又遣督護常深軍毗橋為流驤禦蕩雄攻紳深

破驤殺李攀弟恭句傷為主當有誤左汜黃閭逼攻特當北營營中氏

羌因符成隗伯石定叛應汜閭攻蕩雄蕩母羅環甲略陳伯手刃羅

當重有羅字傷目壯氣益烈又時成伯戰於內汜閭攻其外自晨至日中

營垂欲破會流破深蕩雄破紳還適與汜閭會大破之成伯將其黨

突出詣尚蕩策馬追退軍為叟長矛所搯死羅雄祕不發喪以安衆

心流以特蕩死而岱阜並至恐懼李含勸流降流從之雄與驤諫之

不納遣子世及含子胡質於阜 李離聞父舅將降自梓潼還欲

諫不及雄與離謀襲阜曰若功成事濟當為人主要三年一更雄曰

與君計雖定老子不從若何離曰當制之若不可便行大事雖君叔
勢不得已老父在君夫復何言雄乃說六郡人士激以尚之自侵懼
以共殘蜀民之禍陳當有阜可富貴之秋得以破阜阜軍死者甚衆
而岱病亡荊州軍退轉攻尚 流慙其短軍事任雄雄數破尚當

有尚字 軍保太城 夏四月尚殺隱士劉敞故州牧劉雄曾孫也隱

居白鹿山高尚皓首未嘗屈志亦不預世事尚信祆言殺之殺之日

雷震人大雨城中出水按此下四十四字事與前復當有誤也五月李流降於孫阜遣

子爲質不可乃舉兵與李離襲阜阜軍敗績宋岱病卒墊江州軍退

雄逼攻尚尚保太城中 六月雄從帛羊頽渡攻殺汶山太守陳

圖按圖當作峒通鑑考異云李雄殺陳圖華陽國志作陳峒今從載記可證也李至校刊此書轉依載記改峒作圖耳據郫城

秋七月朔雄入郫城流盡移營據之三蜀民流迸南入東下野

無煙火鹵掠無處亦尋飢餓唯涪陵民千餘家在江西依青城山處

士范賢自守 平西參軍涪陵徐興求爲汶山太守撫帥江西民

與官犄角討雄尚不許輿怨之求使江西因叛降雄雄以爲安西將

軍

當有說賢二字

給其軍糧雄得以振

九月流病死雄復稱大將軍都

督州牧尚數攻郾雄使武都朴泰譎尚曰李驤與雄以飢餓孤危日
鬪爭相咎驤欲將民江西食穀若潛軍來我爲內應可得也尚以爲
然大與金寶泰曰今事故未立効後取不晚也又求遣人自隨覘伺
尚從之泰要發火遣隗伯諸軍攻郾驤使道設伏以長梯上伯軍伯
軍見火起皆爭緣梯雄因放兵擊之大破尚軍雄徑追退夜至城下
稱萬歲曰已得郾城矣入少城尚乃覺保太城驤別攻犍爲斷
尚運道獲太守武陵龔恢恢往爲天水西縣令任回爲吏回問曰識
故吏不恢曰識汝耳郡吏星散惟功曹楊渙侍衛回謂曰卿義人也
吾力恐不能救龔君不能免也卿宜早去渙曰背主求生何如守義
而死遂并見殺以李溥爲犍爲太守雄生獲伯知其傷死
創也伯女爲梁雙妻爲己用故不殺閏十二月尚糧運不繼而

被攻急夜退由牛鞞水東下留牙門張羅持城終夜比雄覺去以遠
倉卒失節鉞羅特從後得之并獲資應雄得成都 梁州刺史許

雄以討賊不進檻車徵詣詔獄惟護軍與漢國太守杜孟治都戰帥

趙汶荊州太守梓潼舊校云疑闕守漢中 永興元年春正月尙至江

陽軍司辛寶詣洛表狀詔書權統巴東巴郡涪陵三郡供其軍賦

冬尙移屯巴郡遣軍掠蜀中斬雄從祖冉獲驤妻咎子壽兄弟

十二月雄太尉李離伐漢中當有都字殺帥趙汶 永嘉元年春

尙施置關戍至漢安魏道 時益州民流移在荆湘州及越雋牂

柯尙書當作施置郡縣就民所在又施當有置字諸村參軍 三月關中

流民鄧定旬氏等掠漢中冬辰勢以叛巴西太守張燕帥牙門武肇

漢國郡丞宣定遣兵圍之氏求救於李雄 夏五月雄遣李離李

雲李璜李鳳入漢中救定杜孟治聞離至命燕釋圍保州城初燕攻

定定衆飢餓僞降送金一器與燕燕納之居七日氏至定還冬辰勢

燕進圍之不聽孟治言離至先攻肇營營破次攻定又破之燕懼戰將百騎走離等大破州軍牙門蔡松退告孟治曰州軍已破賊衆不可待也孟治怖護軍欲城守謂孟治曰賊來雖衆客氣之常李區區有東南之逼必不分宿兵於外不過迎拔定氏耳孟治曰不然雄冒稱帝王縱橫天下以遣重衆必取漢中雖有牢城士民破膽不可與待寇也乃開門退走護軍北還孟治入大桑谷民數千家車數千兩一夜行才數十里而梓潼荆子舊校云疑字有誤以父與孟治有隙合子弟追之及於谷口孟治棄子走荆子獲之及吏民千餘家惟漢國功曹毋建荷檐杖曰吾雖不肖一國大夫國亡不能存終不屬賊也餓死谷中積十餘日離等引還漢中民句方白落率吏民還守南鄭

二年詔書錄尙討特功加散騎常侍都督二州進爵夷陵侯長子宇以佩奉車都尉拜次子延壽騎都尉梁州以雄所破壞晉

更以皇甫商爲梁州商不能之官更用順陽內史江夏張光爲刺史

治新城 漢中民逼李鳳寇掠東走荆沔 三年冬天水旬琦

張金苟略陽羅秉殺雄太尉李離降尚雄太傅驤李雲李璜攻秉為

所破殺雲璜雄從弟也為當有司徒二字雲司空 十有二月琦

等送離母子於尚尚斬之分其室 四年天水文石殺雄太宰李

國以巴西降尚梓潼巴西還屬 初巴西譙登詣鎮南請兵鎮南

無兵表為揚烈將軍梓潼內史義募三巴蜀漢民為兵克復州郡先

征宕渠殺雄巴西太守馬脫還住涪折衝將軍張羅進據犍為之合

水巴蜀為語曰譙登治涪城文石在巴西張羅守合水巴氏那得前

秋七月尚薨於巴郡尚字敬之一名仲字敬真襄陽人也歷尚

書丞郎武陵汝南太守徙梁州臨州 詔書除長沙太守下邳當

此二字皮素泰昆當衍此為益州刺史兼西夷校尉揚烈將軍領義募

人及平西將軍當進治三關時李驤急攻譙登素次巴東勅平西將

軍張順楊顯救登尚子宇恚恨加登糧運不給素至涪欲治執事執

事懷懼 冬十有二月素至巴郡降人天水趙攀閻蘭等夜殺素

素字泰混下邳人也建平都尉暴重殺宇及攀巴郡亂不果救登三

府官屬上巴東監軍冠軍將軍南陽韓松為刺史校尉治巴東

五年春正月李驤破涪城獲登巴西梓潼復為雄有 荆湘有亂

氏符成隗文作亂宜都西上巴東雄眾攻夔道走犍為太守魏紀殺

江陽太守姚襲 二月氏隗文等反於巴東暴重討之未下重殺

刺史韓松松字公治南陽人魏大司徒暨孫也自領三府事 三

月三府文武與巴東太守吏共囚重及妻子於宜都殺之共表巴郡

太守張羅字景治當衍此三字行三府事羅治枳自討隗文於宮圻破降

之旬月復叛劫巴郡太守黃龕託以為主龕窮急當有欲字自殺主簿楊

預諫曰文之宿惡江州所知拘劫明府誰不危心虛假之名孰當信

之可使張將軍知其丹誠何遽如此龕曰賊已道斷何緣得令景治

知之預乃作龕書遺弟逃氏詣羅羅曰子宣宣誠吾自明之耳隗文

聞怒囚龔執預問遣信狀龔曰不遣也文乃考預一日夜預不言文欲殺龔預死杖下文義之赦龔羅遣軍討之破還羅自討之敗績身死羅字景治河南梁人也巴中無復餘種矣文驅略吏民西上降雄

當重有雄字

將任回獲犍爲太守魏紀三府文武共表平西司馬王異行

三府事又領巴郡太守梁州刺史張光復治漢中

六年龍驤將

軍江陽太守犍爲張啓與廣漢羅琦共殺異異字彥明蜀人也啓復行三府事羅琦行巴郡太守啓病亡啓字進明犍爲人蜀車騎將軍

張翼孫也三府文武復共表涪陵太守義陽向沈行西夷校尉

當有率字

吏民南入涪陵

建興元年春沈卒涪陵多疫癘蜀郡太守江陽

程融宜都太守犍爲楊芬西夷司馬巴郡常散都安令蜀郡常

當衍倉

弘等共推汶山太守涪陵蘭維爲西夷校尉

時中原旣亂江東

有事救援無所顧望融等共率吏民北出枳欲下巴東遂爲雄將李

恭費黑所破獲

五月梁州刺史張光討王如黨涪陵李運巴西

王建於盤蛇便作山疑其欲叛也運建走保柸山光遣軍攻破殺之
建女聳楊虎保黃金山以叛討之虎夜棄營還趨厄水去州城四十
里住光遣其子孟萇討之迭有勝負光求助於武都氏王楊茂搜虎
亦求救於茂搜初茂搜子難敵遣養子適賈梁州私買良人子一人
光怒鞭殺之難敵以是怨光曰使君初來大荒之後兵民之命仰我
氏活氏有小罪不能貰也陰謀討光會光虎求救 秋八月茂搜
遣難敵將騎入漢中外言助光內實應虎至州城下光以牛酒饗勞
遣與孟萇共討虎孟萇自處前難敵繼後與虎戰久難敵從後擊孟
萇大破生禽孟萇殺之 九月光恚死州人共推始平太守胡子

序領州

冬十月虎與氏急攻州城子序不能守委城退走氏虎

得州城發光冢焚其屍喪難敵得光鼓吹妓樂自號刺史虎領吏民
入蜀漢中民張咸等討難敵難敵退還咸復入蜀於是三州沒爲雄
矣 蜀自太康至於太安頻怪異成都北鄉有人嘗見女子僻入

草中往視物如人有身形頭目口無手足能動搖不能言廣漢有馬
生角長大各半寸又有驢無皮毛袒肉飲食數日死繁什邡郫江原
生草高七八尺莖葉赤子青如牛角內史耿滕以爲朱草表美於成
都王元康三年正月中欵一夜有火光地仍震童謠曰郫城堅盜底
穿郫中細子李特細又曰江橋頭闕下市成都北門十八字及尙在
巴郡也又曰巴郡葛當下美巴郡皮素之西上也又曰有客有客來
侵門陌其氣欲索 武平府君云譙周言巴當作巴沒三十年後當

有異人入蜀蜀由之亡蜀亡之歲去周三十三年又曰宋岱不死則

孫臏不交當作市三旬之閒流雄之首懸於轅門愚以爲宋岱

方進臏見得質及更推當作推敗設岱生在無所保據矣杜弢自湘中

與柳監軍書曰前諸人不能寬李特一年又不以徐士權爲汶山太

守而屯故如此謂失之毫釐差以萬里斯言有似然必不以杜漸爲

恨者流民初西當承詔書閉關不入其次易代趙廠選宜內遣平西

華陽國志卷第九

李特雄期壽勢志

李特字玄休略陽臨渭人也祖世本巴西宕渠蠻民種黨勁勇俗好鬼巫漢末張魯居漢中以鬼道教百姓蠻人敬信值天下大亂自巴

西之宕渠移入漢中魏武定漢中曾按曾字不當有祖父虎與杜按當有朴

胡按當有約楊車李黑等移於略陽北土復號曰巴人當作特父慕

為東羌獵將特兄弟五人長兄輔字玄政次特特弟庠字玄序庠弟

流字玄通流弟驤字玄龍皆銳驍有武幹特長子蕩字仲平好學有

容觀少子雄字仲雋初特妻羅氏夢雙虹自門升天一虹中斷

羅曰吾二兒若有先亡在者必大貴雄少時辛冉相當貴有劉化者

道術士也言關隴民皆當南移李氏子中惟仲雋天姿奇異終為人

主鄉里人多善之與叔父庠並以烈氣聞人多歸之既克成都

眾皆飢餓驤乃將民入鄴王當作城食穀芋雄遣信奉迎范賢

欲推戴之賢不許更勸雄自立 永興元年冬十月楊褒楊珪共

勸雄稱王雄遂稱成都王追尊曾祖虎曰巴郡公祖父慕隴西王父

特景王母曰太后追謚世父輔齊烈王仲父庠梁武王仲父流秦文

王兄蕩廣漢壯文公以叔父驤為太傅庶兄始為太保外兄李國為

太宰國弟離為太尉從弟雲為司徒璜為司空閻式為尚書令褒為

僕射發為侍中珪為尚書洪為益州刺史徐輿鎮南王達軍師具置

百官下赦建元大武按建元大武當作改元建興國號大成通鑑考異云十六國春秋目錄雄年號建興二晏平五

與華陽國志同今從之諸書雄改元晏平無大武年號惟晉載紀改元大武無晏平年號按雄國號大成魏書雄傳云雄稱帝號大成改

年晏平故三十國春秋誤云改年大成載記轉寫誤為大武今從諸書李至校刊此書轉依載記誤改甚非 迎范賢為丞

相從弟置流子也以不陪列誅之賢既至尊為按當有四時入節四字通鑑考異云華陽

國志尊長生日四時入節天地太師可天地太師封西山侯復其部證亦李至校刊此書轉依載記所刪也

曲軍征不預租稅皆入賢家賢名長生一名延久又名九重一曰支

字元涪陵丹興人也 光熙元年雄稱皇帝改元晏平 永嘉

三年羅蒙匄琦等殺李離於梓潼時閻式去雄依離并見殺驤攻不克時李雲李璜皆戰死

明年文碩殺李國以巴西梓潼

當衍此二字

爲晉平寇將軍李鳳在晉壽

梁州先以爲雄所破不守而譙登

在涪平西參軍向奮屯安漢之宜福張羅屯平無逼雄雄將張寶弟全在匄琦中雄遣寶反爲奸許以代離寶素凶勇先殺人而後奔梓潼密結心腹會羅尙遣使慰勞琦琦等出送其使寶從後閉城門琦等奔巴西雄得梓潼拜寶爲太尉雄自攻奮奮走遣驤攻登登初將驤子壽欲以誘驤被攻急救援不至還驤壽

五年春驤獲登遣

李始督李鳳攻巴西殺文碩是歲雄姨弟任小受張羅募手刃雄頭雄幾死改元玉衡

是後扶風鄧芝揚虎等各率流民前後數千

家入蜀以鳳爲征北梁州任回鎮南南夷寧州李恭征東南蠻荊州皆大將軍校尉刺史雄驤勤卹百姓於內鳳回恭招流民於外稱有功氏符成隗文旣降復叛手傷雄母及其來也咸釋其罪厚加待納

皆以爲將天水陳安舉隴右來降武都氏王楊茂搜奉貢稱臣杜弢自湘州使使求援晉涼州刺史張駿遣信交好漢嘉夷王冲遣子入質頃之朱提審炤率民歸降建寧爨曇蒙險委誠其餘附者日月而至雄乃虛己受人寬和政役遠至邇安年豐穀登乃興文教立學官其賦民男丁一歲穀三斛女丁一斛五斛疾病半之戶調絹不過數丈絲不過數兩事少役稀民多富實至乃閭門不閉路無拾遺獄無滯囚刑不濫及但爲國威儀無則官無秩祿職署委積班序無別君子小人服章不殊貨賄公行懲勸不明行軍無號令用兵無部伍其戰勝不相讓敗不相救攻城破邑動以虜獲爲先故綱紀莫稱

李鳳在北數有戰降之功時蕩子稚屯晉壽害其功 大興元年

鳳以巴西叛驤討之久住梓潼不敢進雄自至涪驤遂斬鳳以壽代

鳳以知州征事

按以知州征事當作梁州知北事

二年驤伐越雋又分伐朱提

三年獲太守西夷校尉李釗

夏進伐寧州大敗於螳螂還

初氏王楊茂搜子難敵堅頭爲劉曜所破奔晉壽晉壽守將李
稚蕩第二子也受其賂遺不送成都曜旣引還稚遣難敵兄弟還武
都遂卽叛稚稚悔失計連白雄求伐氏雄許之羣臣多諫雄不從遣
稚兄瑤以侍中中領軍統稚攻難敵由白水道當作入壽遣當作遣
與稚弟珩由陰平入二道討氏難敵等先拒壽珩珩壽不進而瑤稚
逕至下辨以深入無繼大爲氏所破稚瑤皆死死千餘人雄深自
咎責以謝百姓瑤蕩之元子有名望志尙雄欲傳以後嗣甚痛惜之

雄妻任無子養瑤弟班爲子雄自有庶子十五人羣臣上立嗣
雄曰孫仲謀割有江東伯符兆基子止侯爵國志恥之宣公舍子立
弟君子以爲知人吾將彌縫國志之恥以繼宣公之美驥與司徒王
達諫以爲不可雄不從 永昌元年冬立班爲太子驥泣曰亂始
於是矣 泰寧元年越雋斯叟反攻圍任回及太守李謙遣其征

南費黑救之 咸和元年夏斯叟破 二年謙移郡民於蜀

三年冬驤死追贈相國諡曰漢獻王壽以喪還拜珎征北梁州代壽以班行撫軍將軍脩晉壽軍屯 五年拜壽都督中外諸軍大

將軍中護軍西夷校尉錄尚書總統如驤 冬壽率征南費黑征

東任邵伐巴東至建平監軍毋丘奧退保宜都 六年春壽還遣

任邵屯巴 雄以子越為車騎住廣漢 秋壽伐陰平 冬

城涪陵 七年秋壽南征寧州以費黑為司馬與邵攀等為前軍

由南廣入又別遣任回子調由越嶲入冬十月壽黑至朱提朱提太

守董炳固城寧州刺史尹奉遣建寧太守霍彪大姓爨深等助炳時

壽已圍城欲逆拒之黑曰料城中食少霍彪等雖至齎糧不多宜令

人入城共消其穀猶嫌其少何緣拒之彪等皆入城城久不下壽欲

急攻之黑諫曰南當有中道險俗好反亂宜必待其詐勇已困但當日

月制之全軍取勝以求有餘溷牢之物何足汲汲也壽必欲戰果不

利乃悉以軍事任黑 八年春正月炳彪等出降威震十二郡

三月刺史尹奉舉州委質遷奉於蜀壽領寧州南夷初平威禁甚
肅後轉凌掠民 秋建寧州民毛衍羅屯等反殺太守邵攀牂柯

太守謝恕舉郡爲晉壽破之 九年春分寧州置交州以霍彪爲

寧州建寧爨深爲交州刺史 封壽建寧王 張駿使參軍傅

穎治中張淳遺雄書勸去尊號稱藩於晉雄引見謂曰吾過爲士大

夫所推然本無心於帝王也貴州將令行河沙常所希冀進思共爲

晉室元功之臣退思共爲守藩之將掃除氛埃以康帝宇而晉室凌

遲德聲不振引領東望有年月矣會獲來貺情鈞闇至有何己已穎

淳以爲然使聘相繼巴郡嘗告急云有東軍雄曰吾常慮石勒跋扈

侵逼瑯琊以爲耿耿不圖乃能舉軍使人欣然雄之雅談多如此類

三月壽還 夏六月癸亥雄疾病卒時年六十一僞謚曰武

帝廟稱太宗凡自立三十年按十下當有一字雄以惠帝永興元年

三十一年晉書載記以爲咸和八年雄生瘍於頭六日死時年六十
一在位三十年者別有所出耳李暉校刊此書轉依載記刪去一字

不知雄卒之年載記在八年癸巳國志在九年甲午本有一歲之差也通鑑書九年六月丁卯雄卒胡三省曰載記在去年最爲明晰

冬十二月丙寅葬成都墓號安都陵也

班字世文蕩第四子

也少見養於雄年十六立爲太子好學愛士每觀書傳謂其師友天水文夔隴西董融等曰吾見周景王太子晉魏太子不吳太子孫登文章鑒識超然卓絕未嘗不有慚色何古人之難及乎進止周旋勤於咨問但性輕躁失在田獵

甲子襲位珩來奔喪勸遣雄子越

還江陽而欲令期代己知北事班以未葬不許遣珩還涪

冬十

月癸亥期越殺班於臨次并殺班仲兄領軍都弟珩奔晉期僞諡班曰戾太子壽追諡曰哀皇帝子幽顯爲期所殺班兄弟五人皆兵死四人無後珩在晉歷巴郡襄陽宜都太守龍驤將軍永和三年從征西於山陽戰死也

期字世運雄第四子也母冉賤雄妻任養爲

子少攻學問有容觀雄時令諸子各募合部曲多者纔得數百人而期獨得千餘人爲安東將軍雄亡越自江陽來赴喪兄弟怏怏旣以

班非雄所生又慮珩不利己與兄越密謀圖班太史令韓約上言宮室有陰謀兵氣戒在親戚班不悟遂因夜哭越殺班期自立以越爲相國與壽並錄尙書事進壽大都督徙封漢王使討珩於涪封越建寧王以仲尼霸爲中領軍鎮南弟保鎮西西夷校尉汶山太守從兄始征東代越皆大將軍珩走卽拜壽梁州知北事

咸熙當作元康

年春正月立妻閻氏爲后下赦改元玉恆 秋以司隸景騫爲尙

書令征南費黑爲司隸班舅羅演爲僕射 舅羅演與漢王相天

水上官澹謀襲期立班子幽謀泄殺當有演字澹并誅班母羅瑤子礮稚

妻咎 二年忘從子載多才藝託他事誅之而霸保皆暴病死於

是大臣自疑骨肉不相親而期志益廣忽慢父時公卿政刑失錯

四年夏四月壽自涪還襲期假以誅越騫爲言越請散財募民格

戰期謂壽不自薄不許既誅越騫初廢期爲邛都縣公 五月乃

殺期及誅李始等殺兄弟十餘人期死時年二十四諡曰幽王

五年徙其妻子於越，駕勢又使人就越，駕誅其子。

壽字武考有

幹局愛尚學義志度少殊於諸子，雄奇之。自代父爲將，志在功名。故東征南伐，每有效事。雄疾病，侍疾左右。左右侍臣造雄，顧命寄託於壽。期之殺班也。李始初欲附壽，圖共討期。壽不敢始，怒說期取壽。憚李珩在北，欲藉壽討之。故不許。壽旣受漢封，北伐珩，告以去就利害。假道，故珩得由巴順水東下。吳壽雖代珩鎮涪，歲終當入朝覲。常自危，嫌輒造漢中守將張才，急書告方外寇警。

咸康二年冬，北入

漢中，破走司馬勳。壽見期越兄弟十餘人，年方壯大而手下有強兵，懼不自全。數聘命高士巴西龔壯壯，雖不應，恐見害，不得已數見壽。時岷山崩，江水竭，壽緣劉向之言而惡之。每謀壯以自安之術，壯之父及叔皆爲特所殺，欲假手報讎。未有其由，因說立事何如。舍小從大，以危易安，開國裂土，長爲諸侯，名高桓文，勳流百代矣。壽從之。陰與長史略陽羅恆、巴西解思明共謀，據成都爲晉稱藩。會養弟攸從。

成都病還死道中乃陽言越藥殺之又詐造妹壻任調書言期越當
廢壽以惑羣下羣下信之乃誓文武許賞城中資財得數千人南攻
成都子勢爲開門內應遂獲期越誅其宗族十餘人兵入虜掠民家
奸淫雄公主及李氏諸婦多所殘害數日乃定恆與思明及李弈王
利等勸壽稱鎮西將軍益州牧成都王以壯爲長史告下又勸令送
期於晉任調與司馬蔡興侍中李豔及張烈等勸壽自立壽亦生心
遂背思明所陳之計稱漢皇帝尊父驤曰獻帝母咎氏曰太后下赦
改元漢興以恆爲尙書令思明爲廣漢太守任調鎮北梁州知當有北事
一東羌校尉當衍此二字李弈鎮西西夷校尉更代諸郡及卿佐皆用宿
人及已參佐省交州以從子權爲鎮南南夷寧州於是成都諸李子
弟無復秉兵馬形勢者雄時舊臣及六郡人皆斥廢也 秋七月
李弈從兄乾與大臣合謀欲廢壽壽懼使子廣與大臣盟要爲兄弟
進李閔爲征東荊州移鎮巴郡 八月天連陰雨禾稼傷損百姓

飢疫草莽臣龔壯上封事曰臣聞陰德必有陽報故于公理獄高門待封伏惟獻皇帝寬仁厚惠宥罪甚衆靈德洪洽誕鍾陛下陛下天性忠篤受遺建節志齊周霍誠貫神明而志緒違理顛覆顧命管蔡既興讒諛滋蔓大義滅親撥亂濟危上指星辰昭告天地敵血盟衆舉國稱藩天應人悅白魚登舟霆震助威烈風順義神誠允暢日月光明而論者未喻權時定制淫雨汜瀆垂向百日禾稼傷損加之飢疫百姓愁望或者天以監示陛下又前日之舉止以救禍陛下至心本無大圖而今久不變天下之人誰復分明知陛下本心者哉且玄宮之讖難知而盟誓顧違一日疆場有急內外騷動不可不深思長久之策永爲子孫之計也愚謂宜遵前盟誓結援吳會以親天子彼必崇重封國歷世雖降階一等永爲靈德宗廟相承福祉無窮君臣銘勳於上生民寧息於下通天下之高理弘信慎之美義垂拱南面歌詩興禮上與彭章爭美下與齊晉抗德豈不休哉論者或言二州

人附晉必榮六郡人事之不便昔豫州入蜀荆楚人貴公孫述時流
民康濟及漢征蜀殘民大半鍾鄧之役放兵大掠誰復別楚蜀者乎
論者或不達安固之基惜其各位在昔諸侯自有卿相司徒司空宋
魯皆然及漢藩王亦有丞相今義歸彼但當崇重豈當減削昔劉氏
郡守令長方仕州郡者國亡主易故也今日義舉主榮臣賴寧可同
日而論也論者又謂臣當爲法正陛下覆臣如天養臣如地恣臣所
安至於名榮漢晉不處臣復何爲當侔法正論者或言晉家必責質
任及徵兵伐胡何以應之案晉不煩尺兵一國來附威卷四海廣地
萬里何任之責胡之在北亦此之憂今平居有東北之虞縱令徵兵
但援漢川猶差二門耳臣託附深重忘疲病之穢實感殊遇冀以微
言少補明時常懼殞沒不寫愚心辜負恩顧謹進慳慳伏願罪戮壽
不悅然拘前言祕藏之 九月僕射任顏雄妻弟也謀反誅并殺

雄子豹等

五年春二月晉將伐巴郡獲李閔閔恭子也初壽許

自牛鞞以東土斷與閔執政者以為不可乃止復不益兵故覆沒閔弟豔以是怨故與朝右有隙是時壽疾病恆思明等復議奉晉計尋巴郡破壽以為附晉晉當以兵威故不能自斷遂輟計 三月拜

李弈鎮東代閔 夏建寧太守孟彥率州人縛寧州刺史霍彪於

晉舉建寧為晉遣右將軍李位都討之時權在越巂 秋又遣尚

書廣漢李攄為御史入南中攄祖毅晉故寧州刺史以向與南人有

舊故遣之攄從兄演自越巂上書勸壽歸正返本釋帝稱王壽怒殺

之 車騎將軍王韜為參軍 舊校云右車騎將軍王韜為參軍九字前後文不相屬不知記何事也今

仍舊本存此九字於後以待攷

晉康帝建元元年壽卒勢立改元太和太史令韓皓上言熒惑守心

乃宗廟不脩之譴勢乃更命祀成始祖太宗皆謂之漢勢之弟大將

軍廣以勢無子求為太弟勢不許馬當解思明固請許之勢疑與廣

有謀收當思明斬之廣自殺思明被收歎曰國之不亡以我數人在

也今其殆矣思明有智略敢諫諍馬當素得人心及其死士民無不

哀之冬李奔自晉壽舉兵反單騎突門門者射殺衆潰勢大赦境內

改年嘉寧勢驕淫不卹國事中外離心蜀土無獠原注魯皓切西南夷別族至是

始從山出自巴至犍爲梓潼布滿山谷大爲民患加以飢饉境內蕭

條三年春二月桓温伐蜀軍至青衣勢大發兵遣督堅等將之原注子感

切姓也自山陽趣合水諸將欲設伏江南以待晉兵督堅不從引兵自

江北鴛鴦碕渡向犍爲原注碕渠羈切曲岸曰碕温自將步卒直指成都督堅至

犍爲乃知與温異道還自沙頭津濟比至温已軍於成都之十里陌

堅衆自潰勢悉衆出戰於笮橋原注笮音昨中書監王嘏散騎常侍常璩

勸勢降乃夜開東門走至葭萌使散騎常侍王幼送降文於温勢至

建康封歸義侯按上文晉康帝建元元年壽卒起至此乃李至所續勢志非道將之舊也今亦不更削去

李氏自起事至亡六世四十七年正僭號四十三年按三當作二自晉惠帝光熙元

年丙寅雄稱皇帝至穆帝永和三年丁未勢降故曰正僭號四十二年也又上自惠帝永寧元年特起事歲在辛酉故曰四十七年也

蜀中亦有怪異期時有狗豕交木冬華勢時涪陵民樂氏婦頭上生角長三寸凡三截之又有民馬氏婦妊身而脅下生其母無恙兒亦長育有馬生駒一頭二身相著六耳一牡一牝又有天雨血於江南數畝許李漢家舂米自臼中跳出遽斂於箕中又跳出寫於簞中又跳出有猿居鳥巢至城下地仍震又連生毛其天譴不能詳也

譎曰特流乘釁險害雄能推亡固存遭皇極不建遇其時與期倡為禍階而壽勢終之詩所謂亂離瘼矣爰其適歸者也長老傳譙周識曰廣漢城北有大賊曰流曰特攻難得歲在玄宮自相賊終如其記先識預覩何異古人乎歷觀前世偽僭之徒縱毒虔劉未有如茲每惟殷人丘墟之歎賈生過秦之論亡國破家其監不遠矣舊校云按常璩華陽

國志目錄第九卷及序志皆云述李特雄期壽勢志則先固有志也今諸本皆無之意其傳寫脫漏因循不錄遂失之爾今本諸通鑑所載散騎常侍常璩實勸李勢降桓温璩必作志者因續記此云今按據此知前勢志為李至所續也

華陽國志卷第九

Faint vertical text columns, likely bleed-through from the reverse side of the page.

佛中亦有經云... 佛身而為不生其學... 死亦

佛長三寸凡三指之又有民... 佛身而為不生其學... 死亦

長寬有馬生駒一頭二身相... 佛身而為不生其學... 死亦

數故許李蓮葉君米白白... 佛身而為不生其學... 死亦

跳出有佛居為最至下地... 佛身而為不生其學... 死亦

讓曰時況我輩... 佛身而為不生其學... 死亦

不隨不隨... 佛身而為不生其學... 死亦

曰願... 佛身而為不生其學... 死亦

少... 佛身而為不生其學... 死亦

... 佛身而為不生其學... 死亦

華嚴經疏卷第六

...

...

華陽國志卷第十上

先賢士女總讚

含和誕氣人倫資生必有賢彥爲人經紀宣德達教博化篤俗故太
上立德其次立功其次立言品物煥炳彝倫攸敘也益梁爰在前代
則夏勳配天而彭祖體地及至周世韓服將命蔓子忠堅然顯者猶
鮮豈國史簡闕亦將分以秦楚希預華同自漢興以來迄乎魏晉多
士克生髦俊蓋世愷元之疇感於帝思於是璽書交馳於斜谷之南
東帛彘彘於梁益之鄉或迺龍飛紫閣允陟璿璣亦有盤桓利居經
論皓素其耽懷道術服膺六藝弓車之招旃旌之命徵名聘德忠臣
孝子烈士賢女高劭足以振玄風貞淑可以方蘋蘩者奕世載美是
以四方述作來世志士莫不仰高軌以咨詠憲洪猷而儀則擅名八
區爲世師表矣故耆舊之篇較美史漢而今志州部區別未可總而
言之用敢撰約其善爲之述讚因自注解甄其洪伐尋事釋義略可

以知其前言往行矣

蜀都士女

嚴平恬泊皓然沈冥士嚴遵字君平成都人也雅性澹泊學業加
妙專精大易耽於老莊常卜筮於市假著龜以教與人子卜教以
孝與人弟卜教以悌與人臣卜教以忠於是風移俗易上下茲和
日閱人得百錢則閉肆下簾授老莊著指歸爲道書之宗楊雄少
師之稱其德杜陵李強爲益州刺史謂雄曰吾真得君平矣雄曰
君但可見不能屈也強以爲不然至州脩禮交遵遵見之強服其
清高而不敢屈也嘆曰楊子雲真知人也年九十卒雄稱之曰不
慕夷卽由矣不作苟見不治苟得久幽而不改其操雖隨和何以
加諸

仲元抑抑邦家儀形

李弘字仲元成都人少讀五經不爲章句

處陋巷淬勵金石之志威儀容止邦家師之以德行爲郡功曹一

月而去子贄以見辱殺人太守曰賢者之子必不殺人放之贄自以枉語家人弘遣亡命太守怒讓弘弘對曰贄爲殺人之賊明府私弘枉法君子不誘而誅也石碣殺厚春秋譏之孔子稱父子相隱直在其中弘實遣贄太守無以詰也州命從事常以公正諫爭爲志楊子雲稱之曰李仲元爲人也不屈其志不累其身不夷不惠可否之間見其貌者肅如也觀其行者穆如也聞其言者愀如也非正不言非正不行非正不聽吾先師之所畏

子雲玄達煥乎弘聖

楊雄字子雲成都人也少貧好道家無儻

石之儲十金之費而晏如也好學不爲章句初慕司馬相如綺麗之文多作詞賦車騎將軍王音成帝叔舅也召爲門下史薦待詔上甘泉羽獵賦遷侍郎給事黃門雄旣升祕閣以爲辭賦可尙則賈誼升堂相如入室武帝讀大人賦飄飄然有凌雲之志不足以諷諫乃輟其業以經莫大於易故則而作太玄傳莫大於論語故

作法言史莫善於蒼頡故作訓纂箴諫莫美於虞箴故作州箴賦
莫弘於離騷故反屈原而廣之典莫正於爾雅故作方言初與劉
歆王莽董賢同官並至三公雄歷三帝獨不易官年七十一卒自
劉向父子桓譚等深敬服之其玄淵源懿後世大儒張衡崔子玉
宋仲子王子雍皆爲注解吳郡陸公紀尤善於玄稱雄聖人雄子
神童烏七歲預雄玄文年九歲而卒

林生清寂莫得而名

林閻字公孺臨邛人也善古學古者天子

有輜車之使自漢興以來劉向之徒但聞其官不詳其職職惟閻
與嚴君平知之曰此使考八方之風雅通九州之異同主海內之
音韻使人主居高堂知天下風俗也楊雄聞而師之因此作方言
閻隱遯世莫聞也

汜鄉忠貞社稷是經進賢爲國稽考典刑愛莫助之身殞朝傾

何武字君公鄆人也初以對策甲科爲郎歷揚兗州刺史司隸校

尉京兆尹清河楚沛太守廷尉御史大夫成帝初具三公拜大司
空封汜鄉侯爲人忠厚公正推賢進士在楚致兩龔在沛厚兩唐
臨司隸致茂陵何並居公位進辛慶忌皆世名賢臨州郡雖無赫
赫之名及去民思之才雖不及丞相薛宣翟方進而正直過之哀
帝卽位以朱博趙玄爲公卿用事免官諫大夫鮑子都亟言訟之
丞相王嘉亦以爲慨帝復徵武爲御史大夫徙前將軍時大司馬
新都侯王莽避帝外家丁傅氏遜位亦以列侯見徵哀帝詔博舉
太常莽從武求舉武以莽奸人之雄不許哀帝崩王太皇太后莽
姑也卽日引莽入收大司馬董賢印綬詔舉大司馬丞相孔光等
逼王氏皆舉莽武與左將軍公孫祿謀曰莽五父世朝權傾人主
必危劉氏乃舉祿祿亦舉武太后不從用莽爲大司馬莽諷有司
劾奏皆免武就國後莽浸盛遂爲宰衡安漢公欲圖篡漢憚武與
其叔紅陽侯王立不從元始三年因呂寬吳章事檻車徵武武自

殺衆咸冤之莽欲厭衆心諡武曰刺侯子況嗣平帝崩莽因居攝

後僭王當作真位

叔文播教變風爲雅道洽化遷我實西魯 張寬字叔文成都人

也蜀承秦後質文刻野太守文翁遣寬詣博士東受七經還以教授於是蜀學比於齊魯巴漢亦化之景帝嘉之命天下郡國皆立文學由翁唱其教蜀爲之始也寬從武帝郊甘泉泰時過橋見一女子躑浴川中乳長七尺曰知我者帝後七車適得寬車對曰天有星主祠祀不齊潔則作女令見帝感寤以爲揚州刺史復別虵莽之妖世稱云七車張作春秋章句十五萬言

長卿彬彬文爲世矩 司馬相如字長卿成都人也游京師善屬

文著子虛賦而不自名武帝見而善之曰吾獨不得與此人同世楊得意對曰臣邑子司馬相如所作也召見相如相如又作上林賦帝悅以爲郎又上大人賦以風諫制封禪書爲漢辭宗官至中

郎將世之作辭賦者自楊雄之徒咸則之

王淵豔麗蔚若華圃

王褒字子淵資中人也以高才文藻侍宣

帝初為王襄作樂職中和頌宣帝時又上甘泉洞簫賦帝善之令

宮人誦之為諫大夫卒

子山翰藻遺篇有厚

當作序

楊終字子山成都人也年十三已能

作雷賦通屈原七諫章後坐太守徙邊作孤憤詩明帝時與班固

賈逵並為校書郎刪太史公書為十餘萬言作生民詩又上符瑞

詩十五章制封禪書著

當有春秋二字見後漢書

外傳十二卷章句十五萬言

皆傳於世者

少遷猛毅垂勳三邦

陳立字少遷臨邛人也成帝時特柯有亂

將軍王鳳薦立為太守克平禍亂徙守巴郡秩中二千石治有尤

異又徙天水太守為天下最天子賜黃金四十斤入為左衛護軍

世公賦政祥瑞來同

王阜字世公成都人也太守第五倫察舉

孝廉為重泉令有鸞鳥集於文學十餘日遷益州太守神馬出滇池河甘露降白鳥見民懷之如父母

猗歟文父叡發幼童德澹會稽道崇辟雍 張霸字伯饒謚曰文

父成都人也年數歲以知禮義諸生孫林劉固段著等宗之移家

其字下啓母求就師學母憐其稚對曰饒能故字伯饒也為會稽

太守撥亂興治立文學學徒以千數風教大行道路但聞誦聲百

姓歌詠之致達名士顧奉公孫松畢海胡母官萬虞先王演李根

皆至大位在郡十年以有道徵拜議郎遷侍中遂授霸五更尊禮

於文當作大學年老卒葬河南

少府委遲作卿作師 趙典字仲經成都人也太尉戒孫當作子也

與潁川李膺等並號八俊三為侍中自樂祿俸施貧方授國師未

拜病卒

何楊研神貫奧入微 何英字叔俊鄆人也 楊由字哀侯成

都人也二子學通經緯英著漢德春秋十五卷孫汶字景由亦深
學初徵上日食盜賊起有效爲謁者京師旱請雨卽澍遷犍爲屬
國著世務論三十篇卒楊由爲太守廉范文學范稱能治由言當
有賊發頃之廣柔羌反寇殺長姚超鄉人冷豐齎酒候之值客未
內由爲知其多少又言人當致果其色赤黃果有送柑橘者大將
軍竇憲從太守索雲氣圖由諫莫與尋憲受誅其明如此著書十
篇而卒

司農明允國憲是維 任昉字文始成都人也初爲葉令治奸賊
七十餘人遷梁相尙書令清身檢下大將軍梁冀憚之出爲魏郡
徙平原歲出租稅百萬冀誅復入爲尙書令司隸校尉遷大司農
卒弟愷徐州刺史亦有治名昉父循字伯度爲長沙太守得其父
時爲五官事在精通也

翁君美秀牧後

當作

寤機

何霸字翁君司空武兄也爲郡戶曹

刺史王尊將之官移諸郡不得遣迎太守唯霸白宜往太守遣霸
尊大怒霸對曰太守遣霸非脩敬也以去京師久遲知朝廷起居
耳尊遽下車持節對之因奇霸容止辟為別駕舉秀才為屬國中
郎將弟舊校云闕名今按當作顯見目錄舊校失考也潁川太守兄弟五人皆有名

伯騫推賢求善如飢 柳宗字伯騫成都人也初結九友共學號

九子及為州郡右職務在進賢拔致求次方張叔遼王仲曾殷智
孫等終至牧守州里為諺曰得黃金一笥不如為伯騫所識舉茂

才為陽夏太守按當依目錄作美陽令

文侯顛印極位台衡 文侯趙戒字志伯少府典祖當作父也父定

以游俠稱戒順桓帝之世歷司徒太尉登特進屢居公輔免憂患
於無妄之世告歸於蜀薨家

太尉頡頏志振頽綱 趙謙字彥信戒孫也歷位卿尹初平元年

為太尉時董卓秉政欲遷天子長安謙與司空荀爽固諫卓不聽

以爲車騎將軍奉大駕西幸封洛亭侯拜司隸校尉忤卓指免討
白波賊有功封當有侯進司徒免拜尙書令太僕三年薨諡曰忠
侯

司徒繼踵僂俛權橫

趙溫字子柔謙弟以侍中與當有大同輦

西遷封江南亭侯兄亡初平四年拜司空未暮進司徒當世榮之
時車騎將軍李傕與董卓承張濟等爭權數遷移天子溫以書切責
於傕天子聞爲寒心尋曹公入徙天子都許政出諸侯禮待溫居
公位十五年建安十三年薨

猶操道柄董卓是讓

讓責也董卓李傕凶擅謙溫干之初文侯

與李固胡廣議立清河王蒜而冀欲立蠡吾侯趙戒脅而從之使
李固枉死君子以爲卓傕之惡甚於梁冀謙摩卓之牙溫弄傕之
爪雖逼權勢以道陳訓賢其祖遠矣

侍中授命分節亦彰

常洽字茂尼江原人也自荊州刺史遷京

兆尹侍中長水校尉以兵衛大駕西幸催等作難常侍衛天子左
右為催所煞

蠻夷猾擾倡亂南疆子恭要傳醜穢于攘 楊竦字子恭成都人

也永當作元初中越巂永昌夷反殘破郡縣衆十萬餘刺史張喬以

竦勇猛授從事任平南中竦先以詔書告喻不服乃加誅煞虜三
萬餘人獲生口千五百人財物四千萬降夷三十六種舉正奸濁
長吏九十人黃綬六十人南中清平會被傷卒喬舉州弔贈列畫
東觀

伯春孟元匡正時君 張充字伯春 李晃字孟元江原人也

充為治中從事時刺史恃豪每見從事布席地坐己自安高牀上

充入閣不肯進刺史寤乃更禮從事刺史辟公孫特大姓犍為李

威橋稚充曹舊校云闕事節時有水災倫受刺史指以漢中斗平不足表

聞晃固爭之後刺史至與倫不平求郡短劾倫不言水災晃對以

幾
詔書上災異不得由州倫遷司空辟兖掾舊校云兖居希切說文微也殆也兖古字今作

楊羅爲令遺愛在民

楊班字仲桓成都人也

羅衡字仲伯

郫人也俱師徵士何初山

按初山當作幼正後漢書楊序傳注何萇幼正是也

班爲不韋茂

陵令治化浹洽徙西城閬中令號時名宰衡爲萬年令路不拾遺

人家牛馬皆繫道邊曰屬羅公三府爭辟拜廣漢長二縣皆爲立

祠

小伯温恭預圖息紛

陳湛字小伯成都人也歷數縣令民皆懷

服州辟治中從事廣漢太守遣子詣州脩歡交使君欲納湛諫不

可失羔羊義使君從之後有言州郡私交者考之無得乃明也

孟由至孝遐葉晞風

禽堅字孟由成都人也父信爲縣史

當作使

越嵩爲夷所得傳賣歷十一種去時堅方妊六月生母更嫁堅壯

乃知父湮沒鬻力傭賃求碧珠以求父一至漢中三出徼外周旋

萬里經六年四月突瘴毒狼虎乃至夷中得父父相見悲感夷徼
哀之卽將父歸迎母致養州郡嘉其孝召功曹辟從事列上東觀
太守王商追贈孝廉令李苾爲立碑銘迄今祠之

仲昱勉師

仲昱成都人也少受學於嚴季后季后爲汶江尉書

呼仲昱仲昱許十月往會夷反斷道仲昱期於往經度六七幾死
數年卒得至汶江爲季后陳策俱得免難遠近嘆之

叔本慕仁

任末字叔本新繁人也與董奉德俱學京師奉德病

死推鹿車送其喪師亡身病齋棺赴之道死遺令勅子載喪至師
門敘平生之志也

伯禽證將

朱普字伯禽廣都人也爲郡功曹太守與刺史王冀

有隙枉見劾普詣新都獄掠笞連月肌肉腐臭惡同死人證太守
無事勅其子曰我死載喪詣闕使天子知我心事得情理普以烈

聞

文寺代君

李磬字文寺嚴道人也爲長章表主簿旄牛夷叛入

攻縣表倉卒走鋒刃交至磬傾身捍表謂虜曰乞煞我活我君虜乃煞之表得免太守嘉之圖象府庭

在三義敦終始可稱

人生於三事若一君父師也言人靡不有

初鮮克有終普磬可謂能終始也

炎光中微巨述僭亂

炎火光也漢以火德王自高祖至平帝十

二世國嗣三絕平帝早崩安漢公王莽字巨君遂篡天子位稱新室皇帝而茂陵公孫述字子陽爲莽導江卒正遂僭號於蜀

章王刎首

章明字公孺新繁人也

王皓字子離江原人也

明爲太中大夫莽篡位嘆曰不以一身事二主遂自煞皓爲美陽令去莽歸蜀公孫僭號使使聘之皓乃自刎以頭付使者述慚怒誅其妻子

侯剛哭漢

剛字直孟新繁人也爲郎見莽篡位佯狂負木斗守

闕號哭莽使人問之對曰漢祚無窮吾寧死之不忍事非主也莽追煞之

公卿絕脰亦蹈節貫

王嘉字公卿江原人也為郎去莽還留

當

蜀公孫述先閉其妻子使人徵之嘉聞王皓死歎曰吾後之哉亦自煞述慚貫其妻子

羅生美至思濟艱難述方遂非殘彼貞幹

羅衍字伯紀成都人

也為述郎說述尚書解文卿鄭文伯使諫述降漢為子孫福解鄭從之述怒閉二子於薄室六年二子守志不回遂幽死衍卒察孝

廉徵博士

劉主割據資我英俊鴻臚淵通與道推運

何宗字彥若郫縣人

也通經緯天官推步圖讖知劉備應漢九世之運讚立先主為大鴻臚方授公輔會卒

君肅矯矯穎類倬羣

何祗字君肅宗族人也初犍為楊洪為太

守李巖功曹去郡數年以爲蜀郡巖猶在官祇爲洪門下書佐去郡數年以爲廣漢洪猶在官是以西土咸服諸葛亮之能攬拔秀異也祇徙犍爲太守卒

輔漢朗捷服時之勲

張裔字君嗣成都人也汝南許文休稱其

才鍾元常輩也爲輔漢將軍丞相長史丞相北征居府統事足食足兵

太常清密邃遠鉤深

杜瓊字伯瑜成都人也師事任定祖通經

緯術藝爲太常沈默慎密稱諸生之淳

休休衆彥殊塗同臻金聲玉振蜀之球琳

休休美也衆彥言此

四十三人也易曰殊塗同歸百行齊致貴於流光顯稱揚名垂世此四十三人者雖立行不同俱以垂美如金玉之音器爲世名寶

述蜀郡人士

敬司穆穆暢始玄終

敬司馬氏女五更張伯饒妻也霸前妻有

三男一女敬司產一男撫教五子恩愛若一霸卒葬河南敬司與諸子還蜀疾病遺令告諸子曰舜葬蒼梧二妃不從汝父在梁吾自在蜀亦各其志勿違吾勅也遂葬蜀子光超稟母教爲聘士也

叔紀婉婉十媛仰風

叔紀霸女孫也適廣漢王遵至有賢訓事

姑以禮生子商海內名士廣漢周幹古朴彭緄漢中祝龜爲作頌曰少則爲家之孝女長則爲家之賢婦老則爲子之慈親終温且惠秉心塞淵宜謚曰孝明惠母

公乘氏張兩髦義崇

公乘會妻廣都張氏女也夫早亡無子姑

及兄弟欲改嫁之張誓不許而言之不止乃斷髮割耳養會族子事姑終身

助陳撫孩節篤分充

助陳臨邛陳氏女犍爲楊鳳珪妻也鳳珪

亡養遺生子守節兄弟必欲改嫁乃引刀割咽宗族駭之幾死遂

全其義

二常熒熒頽搆再隆

元常靡常江原人也元常廣都令常良女

適廣漢便敬賓早亡元常無子養賓族子父母欲嫁乃祝刀誓志

而死靡常仲山女適成都殷仲孫家遭疫氣死亡惟靡常在十八

此二字當在死亡下讀
死亡十八四字爲一句收葬諸喪養遺生子立美成家

紀常哀哀精感昭融

紀常常侍常洽女趙侯夫人也父遇害長

安其二兄皆先沒遣父門生翟登張順迎喪時寇賊蜂起晝夜悲

哀順登得將喪無恙還時人皆以紀常精誠所感

貢羅誓志

貢羅郫羅倩女景奇妻也奇早亡無子父愍其年壯

以許同郡何詩貢羅白書誓父不還家父使詩乃白州州告縣逼

遣之羅乃訴州刺史高而許之

玃何忘生

玃何郫何氏女成都趙憲妻也憲早亡無子父母欲

改嫁何恚憤自幽乃不食旬日而死郡縣爲立石表

昭儀殉身

昭儀新繁張氏女廣漢朱叔賢妻也賢爲郡督郵建

安十九年劉主圍劉璋於成都賢坐謀外降璋以昭儀配兵將見逼昭儀自殺三軍莫不哀嘆

二姚見靈 廣柔長郫姚超二女姚妣饒未許嫁隨父在官值九

種夷反殺超獲二女欲使牧羊二女誓不辱乃以衣連腰自沈水

中死見夢告兄慰曰姊妹之喪當以某日至漑下慰寤哀愕如夢

日得喪郡縣圖象府庭

義義淑媛表圖銘旌 淑善媛婉婉也言此十二女皆圖象列傳

迷蜀郡列女

右蜀郡士女讚第一

凡五十五人 四十三人
十二人女

巴郡士女

按舊本自此脫去乃闕讚之第二也今僅能知此標題而無從補其文矣近人見舊本較張佳胤以來所刻多第十之上中兩卷謂為完書其實不然又按卷末云二州人士二百四十八人今存蜀廣漢犍為漢中梓潼共一百九十四人所闕

巴郡士女凡五十四人也士一百九十七所存者一百五十
所闕巴郡四十七人土也女五十一今存四十四所闕巴郡
七人女也姓名必具在目錄而無讚者亦
並列故不可推知今但考得其凡如此

華陽國志卷第十上

華陽國志卷第十中

廣漢士女

講學沖邃洙泗是睎胤帝紹聖庶熙疇咨

楊宣字君緯什邡人

也少受學於楚國王子張天文圖緯於河內鄭子侯師楊公叔能
暢烏言長於災異教授弟子以百數成帝徵拜諫大夫帝無嗣宣
上封事勸宜以定陶恭王子爲太子帝從之出宣爲交州牧太子
卽位爲哀帝拜河內太守徵太倉令上言宜封周公孔子後帝從
之封周公孫相如爲褒魯侯孔子後孔均爲褒成侯又薦遼東王
綱瑯琊徐吉太原郭越楚國龔勝等宜讚隆時雍平帝時命持節
爲講學大夫與劉歆共校書居攝中卒門生河南李吉廣漢嚴象
趙翹等皆作大儒

長伯撫遐聲暢中畿析虎命邦綽有餘徽

鄭純字長伯鄆人也

爲益州西部都尉處地金銀琥珀犀象翠羽出作此官者皆富及

十世純獨清廉毫毛不犯夷漢歌嘆表聞三司及京師貴重多薦美之明帝嘉之乃改西部為永昌郡以純為太守在官十年卒列畫頌東觀

三老泱泱實作父師 楊統字仲通新都人也事華里先生炎高

高戒統曰漢九世王出圖書與卿適應之建武初天下求通內識二卷者不得永平中刺史張志舉統方正司徒魯恭辟掾與恭共定音律上家法章句及二卷解說遷侍中光祿大夫以年老道深養於辟雍授几杖為三老卒內識二卷竟未詳

平仲淑道殆乎庶幾 王祐字平仲鄴人也少與雒高士張浮齊

名不應州郡辟命司隸校尉陳紀山名知人稱祐天下高士年四十二卒弟獲志其遺言撰王子五篇東觀郎李勝文章士也作誅

方之顏子列畫學官 舊校云獲一作灌

文父明洞探蹟索微 楊序字仲桓統仲子也道業侔父三司及

公車連徵辟拜侍中上言四方及荆揚交州當兵起人民疫蝗洛

陽大水宮殿當災三府當免舊空二格當是陰臣二字見後漢書近戚謀變皆效驗

大將軍梁冀秉權自退舊空六格當是歸家遂脩黃老六字見後漢書授門徒三千人本

初元年及建和中特徵聘不行年八十三卒天子痛惜詔諡曰文

父弟子維昭約節宰絲竹寇懼文儀蜀郡何萇幼正侯祈升伯巴

郡周舒叔布及任安董扶等皆徵聘辟舉馳名當世

元章玄泊韜光匿耀當作輝段翳字元章新都人也明經術妙占

未來常告大渡津口曰某日當有諸生二人荷擔問翳舍處者幸

爲告之後竟如其言又有人從冀州來學積年自以精究翳術辭

去翳爲筒作書封頭與之告曰有急發之至葭萌爭津吏撾從者

頭諸生發筒筒中有書曰到葭萌爭津破頭以膏裹之生乃喟然

知不及翳還更精學翳常隱匿不使人知門人皆號夫子

稚子奕奕古之畏愛 王渙字稚子鄴人也初爲河內温令路不

失遺臥不閉門民歌之曰王稚子世未有平徭役百姓喜遷兗州
刺史部中肅清徵拜侍御史洛陽令聰明惠斷公平廉正抑強扶
弱化行不犯發奸擿伏忽若有神京華密靜權豪畏敬元興元年
卒百姓痛哭二縣弔喪行人商旅莫不祭之賈胡左威遭其清理
制服三年洛陽弦歌之為立祠天子悼惜每下詔書德令必賜後
嗣與卓茂等為伍

敬伯愷悌樹德播惠

王堂字敬伯鄆人也初臨巴郡進賢達士

舉孝子嚴永隱士黃錯及張璠陳髦民為立祠徙任右扶風政教
嚴明帝舅車騎將軍閻顯大將軍竇憲中常侍江京等囑託輒拒
之白鹿見象不以為祥徙魯相又徙汝南守舉陳蕃為功曹應嗣

按後漢書堂傳云委功曹陳蕃又云任主簿
應嗣此應嗣下當有脫文今無以補之也

司隸校尉號知人之

鑑

叔宰濟濟以禮進退

馮顥字叔宰鄆人也少師事楊仲桓及蜀

郡張光超後又事東平虞叔雅初爲謁者儀威濟濟爲成都令遷越巂太守所在著稱爲梁冀所不善冀風州追之隱居作易章句及刺奢說脩黃老恬然終日

大匠奇暢妙監玄察盡言世規祇以隕越

翟酺字子超雒人也

少事段熲以明天官爲侍中尙書常見太史令孫懿獻欬涕泣曰圖書有賊臣孫登將以才智爲黃門開路君表相應之是以悽愴後爲京兆尹光祿大夫將作大匠上言漢四百年當有弱主閉門聽政數在三百年之閒薦故太尉龐參故司徒李郃明通三才忠正可以輔世所言每指刺疾權貴誣酺及尙書令高堂芝交搆免死著援神契經說卒家

司隸聰敏奮名後葉

郭賀字喬卿雒人也初爲太守黃幸戶曹

幸有事與漢中太守李榮俱被徵賀勸幸星行詣詔獄自歸得免榮稽留詔殺之由是顯名太守蔡茂命爲主簿茂夢坐太極殿按

作殿極見後漢書蔡茂傳章懷注云屋之大者古通呼上得嘉禾為殿極殿梁也前書音義曰三輔閒謂屋梁為極可證

三穗以問賀對曰明府位當至三公旬月茂遷司徒表賀明律令稍遷侍中尚書僕射司隸校尉荊州刺史明帝南巡狩善其治徵河南尹卒天子痛惜賜錢三十萬

譚蔡翩翩交友惟賢

譚顯字子誦鄴人也

蔡弓字子騫雒

人也俱攜手共學冬則侍親春行受業與張霸李郃張皓陳禪為友共師司徒魯恭顯又與王稚子同見察孝於太守陳司空歷豫州刺史光祿大夫侍中衛尉弓為廬江太守徵拜郎而霸郃皓禪皆至公卿

兩李麗采文藻可觀

李尤字伯仁

李勝字茂通雒人也侍

中賈逵薦尤有相如楊雄之才明帝召作東觀辟雍德陽諸觀賦銘懷戎頌百二十銘著政事論七篇帝善之拜諫大夫樂安相後與劉珍共撰漢紀孫充有文才勝為東觀郎著賦諫當作諫見後漢書論

頌數十篇

憲父懸車

王稚字叔起堂幼子也屢拒孝廉公府十五辟公車徵及授二千石徵以太常終不詣年八十一卒門人錄其本行諡曰憲父癸未詔書以安車聘請會已亡

徵君肥遯

馮信字季誠鄴人也郡三察孝廉州舉茂才公府十辟公車再徵不詣公孫述時託目青盲侍婢姦其前陽不覺述卒以年老不出

董任循志束帛菱菱

董扶字茂安

任安字定祖緜竹人也

家居教授弟子自遠而至扶初應賢良方正詣京師宰府十辟公車三徵再舉有道爲侍中觀漢將亂求爲屬國還蜀安察孝及茂才公府辟公車徵皆不詣卒布衣弟子杜微何宗杜瓊皆名士至卿佐

文表汜博提攜士彥

王商字文表廣漢人也博學多聞州牧劉

璋辟爲治中試守蜀郡太守荊州牧劉表大儒南陽宋仲子遠慕其名皆與交好許文休稱商中夏王景興輩也商勸璋攬奇拔雋甚善匡救薦致名士安漢趙韙及陳實盛先塾江龔楊趙敏黎景閔中王澹江州孟彪皆至州右職郡守又爲嚴李立祠正諸祀典在官一十年而卒

超類拔萃實惟世信

劉寵字世信緜竹人也出自孤微以明公

羊春秋上計闕下見除成都令政教明肅時諸縣多難治乃換寵爲郫令又換鄴安漢皆垂績還在成都遷牂柯太守初乘一馬之官布衣疏食儉以爲教居郡九年乘之而還吏人爲之立銘王商陳實當世貴士皆與爲友

節英亢烈仰訴鼎臣

段恭字節英雒人也少周流七十餘郡求

師受學經三十年凡事馮翊駱異孫泰山彥之章渤海紀叔陽遂明天文二卷東平虞叔雅學絕高當世遂遊於蜀恭以朋友禮待

之後爲上計掾會有司劾太尉龐參兼舉茂才孝廉參性忠正亮直爲貴戚所擯以恚發病遠近稱冤恭不能耐其枉亢疏表參忠直不當以讒佞傷毀忠正帝悟卽日召西曹掾問疾尋羊酒慰勞參忠

士遊孝淳感物悟神 姜詩字士遊雒人也事母至孝母欲江水及鯉魚膾又不能獨食須鄰母共之詩常供備子汲江溺死祕言遣學不使母知於是涌泉出於舍側有江水之香朝朝出鯉魚二頭供二母之膳其泉灌田六頃施及比鄰公孫述平後東精爲賊掠害不敢入詩里時大荒飢精致米肉與詩詩埋之永平三年察孝廉明帝詔曰大孝入朝孝廉一切皆平之除江陽符長所居鄉皆爲之立祠

少林陰德陽報是甄 王饨字少林新都人也游學京師見客舍有一書生困病饨隱視奄忽便絕有金十斤饨以一斤買棺木九

斤還要下葬埋之後爲大度亭長大馬一匹來入亭中又有繡被一領飛墮其前人莫識者郡縣以異恠後乘馬到雒縣馬牽恠入他舍主人問恠所由得馬恠具說其狀并及繡被主人悵然曰卿何陰德而致此恠說昔埋書生事主人驚曰是我子也姓金名彥卿乃葬之不報天彰卿德辟舉茂才除郿令宿釐亭中數有人爲鬼所煞恠上樓夜半有女子稱冤曰妾涪令妻也當之官宿此枉爲亭長所煞大小二十口埋在樓下奪取財物恠曰汝何故以恆殺人女子曰妾不得白日惟依夜愬人眠不肯應恠故殺之初來時言無衣恠以衣衣之言訖投衣而去旦召遊徼詰問具服卽收同謀十餘人煞之送涪令喪還鄉里當世稱之

仲魚謙沖

羊蒼字仲魚鄴人也父爲交州刺史卒官蒼迎喪不

敢取官舍一物郡三察孝廉公府辟州別駕皆不應太守尹奉棄刑名行禮樂請爲功曹刺史必欲借蒼自佐不得已爲別駕後爲

太守孫寶蔡茂殺諷功曹當欲渡津津吏滯停車待之二日將宿中亭中有縣吏引車避之爲野王令

雲卿安貧

朱倉字雲卿什邡人也受學於蜀郡張寧滄豆飲水

以諷誦同業憐其貧資給米肉終不受著河洛解家貧恆以步行爲郡功曹每察孝廉羞碌碌詣公府試不就州辟治中從事以諷詠自終

伯式玄照

折像字伯式雒人也其先張江爲武威太守封南陽

折侯因氏焉父國爲鬱林太守家貲二億故奴婢八百人盡散以施宗族卹贍親舊葬死弔喪事東平虞叔雅以道教授門人朋友自遠而至時人爲諺曰折氏客誰朱雲卿段節英中有佃子趙仲平但說天文論五經

孟宗當仁

杜真字孟宗緜竹人誦書百萬言兄事翟醜醜免後

尙書令與司隸校尉枉劾之復徵詣獄真上章救之受掠笞六百

獄中明黼無事京師壯之以漢道微散財施宗族不應公府辟命及辟長吏候迎每交於門乃斷髮以自絕

味道好施清風邁倫

讚仲魚以下也

漢儒請雨精感慶雲

諒輔字漢儒新都人爲郡五官掾時天大

旱請雨不降輔出禱祈乃積薪祝神曰不雨則欲自焚爲貪叨吏謝罪百姓言終暴雨

韓揆義烈

韓揆字伯彥緜竹人也爲令錡裒主簿值黃巾賊入

界扶裒走入草中裒遣求隱翳處未還裒爲賊所得見害揆殞殮葬埋訖詣從事賈龍求兵討賊賊破曰本報令君而苟自活非忠乃自煞

喬雲勇震

左喬雲緜竹人也少爲左通所養爲子通坐任徒徒

逃吏欲破通牘通無壯子故爲吏所侵喬雲時年十三喟然憤怒以銳刀煞吏解通走將令出追初聞以爲壯士及知是小兒爲之

流涕

楊寬證將烈播友人

寬字叔仲新都人也父斌證令萬世太守

役諷以忠義壯聞寬爲郡吏鄉人馬閏章言太守五方寬與兄皆
詣獄證之得理後方當遷南郡閏復章之寬乃發閏臨私事閏伏
罪友人汝錕爲張明所煞寬怒縛明送錕家使自謝之也

甯叔執仇

甯叔字茂泰廣漢人與友人張昌共受業太學昌爲

河南大豪呂條所煞叔煞條自拘河南獄順帝義而赦之

張復師讎

張鉗字子安廣漢人也師事犍爲謝裒裒死負土成

墳三年裒子爲人所煞鉗復其讎自拘武陽獄會赦免當世義之
賈爲士死分侔虞朱 賈栩字元集什邡人也雒孟伯元爲父復

讎聞栩各往投之雒縣追伯元蹤栩嘆曰士以義遇我豈可倍哉

煞雒縣

當有脫文

必移什邡負我君乃自煞李勝言

當作誅

之以方虞卿

魯之衍朱家

郭玉通直當作術

蓋亦所脩

郭玉字通直

按當衍三字後漢書玉傳無字可證

新都

人也明方術伎妙用針作經方頌說官至太醫丞校尉

當衍二字後漢書玉

傳無可證

爰迄劉氏司農含章爽朗翠粲觀國之光

秦宓字子勅絲竹人

也初隱遁不應州郡之命丞相亮領益州牧選為別駕中郎將吳

使張温將反命亮率百官餞之温與宓語荅問若嚮應聲辭義雅

美温大敬服以為蜀之有宓猶魯有仲尼也遷長水校尉司農宓

甚有通理弟子譙周具傳其業

李王四子並作琳瑯

李朝字永南弟邵字偉南鄭人也王士字

義強從弟甫字國山文表諸弟也先主領牧朝為別駕羣下上先

主為漢中王其文朝所造也

當有脫文按李邵事在陳壽季漢輔臣贊注中但恐道將之文不全同今

無以補之也

後丞相亮府辟西曹掾亦有文才兄弟三人號三龍士歷

宕渠犍為益州太守甫善言議

舊校云闕按陳壽輔臣贊注云好入流言議當無所闕舊校誤耳

人流美稱自繇竹令爲州右職

優遊容與特進太常

鄧承字公文鄴人也歷郡守州右職爲少

府太常時費姜秉政孟光來敏皆棲遲承以和獨立特進之也

從事烈至諫君刎首

王累新都人也州牧璋從別駕張松計遣

法正迎先主主簿黃權諫不納累爲從事以諫不入乃自刎州門

以明不可

鄭度進規忠謀莫受雖云天時抑由人咎

度繇竹人也先主自

葭萌南攻說牧璋曰左將軍懸軍襲我野穀是資急驅巴西梓潼

民由涪水以南一切燒除野穀固壘待之彼請戰不許久無所資

不過百日必當面縛先主聞而惡之璋不納言雖在天亦由璋之

愚

永年負才自喪世主

彭蒙字永年廣漢人有俊才劉璋時坐事

爲徒及先主入自託龐統爲州右職失主意左遷江陽太守蒙望

諸葛亮以為心大志廣難可保勸先主因事誅之

漢南哽哽天奪其守

李邈字漢南邵兄也牧璋時為牛鞞長先

主領牧為從事正旦命行酒得進見讓先主曰振威以將軍宗室

肺腑委以討賊元功未効先寇而滅邈以將軍之取鄙州甚為不

宜也先主曰知其不宜何以不助之邈曰匪不敢也力不足耳有

司將殺之諸葛亮為請得免久之為犍為太守丞相參軍安漢將

軍建興六年亮西征馬謖在前敗績舊無此敗績二字三國志注引有者是亮將殺

之邈諫以秦赦孟明用霸西戎楚誅子玉二世不競失亮意還蜀

十三年亮卒後主素服發哀三日邈上疏曰呂祿霍禹未必懷反

叛之心孝宣不好為殺臣之君直以臣懼其偏主畏其威故姦萌

生亮身杖強兵狼顧虎視舊作臣三國志注引作視五大不在邊臣常危之今

亮殞歿蓋宗族得全西戎靜息大小為慶後主怒下獄誅之

誅誅彥造或哲或友昭德音芳垂名厥後

總讚此四十六人也

述廣漢人士

任母治內子成名賢

任安母姚氏也雍穆閨門早寡立義資安

遂事大儒安教授每爲賑卹其弟子以慰勉其志於是安之門生益盈門

龐行養姑婦師之先

龐行姜詩妻也事姑晝夜紡績以給供養

子汲江溺水死祕言遣詣學常作冬夏衣投水中託言寄與子詩呼妻使爲姑舂應命遲見遣不敢遠去遊於外供給因鄰母致姑勅還

依依義舊抗疏拜庭誠感世主徙女輟刑

義舊狄道長姜穆女

絲竹司馬雅妻也既許婚父坐事徙朔方雅就婚死雇人送其喪尋父母死朔方義舊獨與弟孤居十年士大夫求終不肯乃上疏自訟求還鄉里天子愍悼下朔方使送遂下詔書定律令女子許嫁不得從父母徙

紀配斷指以章厥貞

紀配廣漢殷氏女廖伯妻也年十六適伯

伯早亡以己有美色慮人求己作詩三章自誓心而求者猶衆父母將許乃斷指明情養子猛終義太守薛鴻圖象府庭

彭王進娥殘體令誠

彭非廣漢王輔妻也王和新都人便敬妻

也李進娥鄴人馮季宰妻也輔早亡叔父欲改嫁非乃詣太守五方截髮自誓敬亦早亡和養孤守義蜀郡何玉因媒介求之兄曉喻以公族可憑和恚割其一耳季宰亦早亡父母欲改嫁進娥亦剪髮自誓各養子終義

正流自沈玉潔冰清

正流廣漢李元女楊文妻也適文有一男

一女而文沒以織履爲業父欲改嫁乃自沈水中宗族救之幾死得免太守五方爲之圖象

相烏袁福義不存生

相烏德陽人袁稚妻也十五適稚二十稚

亡無子父母欲改嫁之便自殺袁福亦德陽人王上妻也有二子

上以喪親過哀死福哀感終身父母欲改嫁乃自殺

汝氏世胄由婦謙柔

汝敦妻某敦兄弟共居有父母時財嫂心

欲得妻勸送二兄敦盡讓田宅奴婢與兄自出居後敦耕得金一器妻復勸送二兄夫妻共往嫂性恠嗇謂欲借貸甚不悅及見金踊躍兄感悟即出妻讓財還第弟不受相讓積年後並察孝廉世為冠族

思媚列媛美稱惟休

總讚十一人也

迷廣漢列女

右廣漢郡士女讚第三

凡五十七人四十六人士女

健為士女

王延河平纂禹之功

王延世字長叔資中人也建始五年河決

東郡汜濫兗豫四郡三十二縣沒官民屋舍四萬所御史大夫尹

忠以不憂職致河決自煞漢史案圖緯當有能循禹之功在犍柯之資陽求之正得延世徵拜河堤謁者治河以竹落長四丈大九圍夾小船載小石治之三十六日隄防成帝嘉之改年曰河平封延世關內侯拜光祿大夫仍賜黃金百斤

文伯習禮繼武孫通

董鈞字文伯資中人也少受業於鴻臚王

臨永平初議天地宗廟郊祀儀禮鈞與太常定其制又定諸侯王喪禮歷城門校尉五官中郎將以儒學貴稱繼叔孫通

張公執憲克智克聰極位青紫實作司空

張皓字叔明武陽人

也以文

按此下當有脫字

聰明辟大將軍掾遷尙書僕射彭城相進隱士

閻丘遷等徵拜廷尉延光三年安帝將廢太子爲濟陰王皓與太常桓焉太僕來歷爭之安帝不許及安帝崩濟陰得立爲順帝以皓爲司空久之免復徵爲廷尉清河趙騰坐謗訕當誅所引八十餘人皓以聖賢明義爭之咸稱平當

子鸞司京桴鼓不鳴 趙旂字子鸞資中人也初臨甘陵弘農郡

甚善治民徵尚書遷司隸校尉時梁冀子弟放恣旂以法繩之不

敢為非京師肅清桴鼓不鳴

孟文翹翹平

當作

顯有成

楊渙字孟文武陽人也以清秀博雅

歷臺郎相稍遷尚書中郎司隸校尉甚有嘉聲美稱

伯邳正直耀祖揚聲

楊準

按準當作淮下同隸續引作淮不誤

字伯邳漢安縣人

也初為郡守太尉李固薦準累世忠直拜尚書太傅陳蕃表為河

東入為尚書令奏書治南陽太守曹麻潁川太守曹騰濟南太守

孫訓等子弟依託形勢淫縱徵廷尉治罪訓梁冀婦家子也於是

憚之又薦朱禹盛精滕延為尚書陸稠為郡守皆名士也桓帝即

位拜河南尹遷司隸校尉冀叔父梁忠為執金吾不朝正初劾奏

之朝士服其公亮徙將作大匠

翁君將命迺播其名

楊莽字翁君武陽人為功曹刺史王尊當

之州移書諸郡不得遣迎惟健為遣莽蜀郡遣何霸嚴尊尊大怒
莽前對曰使君不使奉迎謙也太守承迎敬也謙敬上下之節不
可廢也尊乃欣然請辟別駕舉茂才官至揚州刺史

奉君遜世 費貽字奉君南安人也公孫述時漆身為厲佯狂避

世述破為合浦守蜀中歌之曰節義至仁費奉君不仕亂世不當
避惡君修身於蜀紀名亦足後世為大族

任公開明 任永字君業棘道人也長歷數王莽時託青盲公孫

述時累徵不詣子溺井中死見而不言妻淫於前面而不怪述平
乃曰世適平目即清妻自煞光武徵之以年老不詣卒

叔和順終 杜撫字叔和資中人也少師事薛漢治五經教授門

生千人太守王卿召為功曹司徒辟不當有詣字及聞公免必往承問

東平憲王為驃騎將軍辟西曹掾後罷為王師在驃騎府者遣之
數年乃去數應三公徵撫侍送故公作詩通議說弟子南陽馮良

亦以道學徵聘

君橋密精

趙松字君橋武陽人爲童子數資問費貽及知其避

世密與周旋終不露之也述平舉茂才爲上黨太守

英英四子利於居貞

讚費貽以下

皇漢弛綱官人失紀文紀謬誇表明臧否

張綱字文紀司空皓

子也在漢

當

行朝公平廉正權宦側目憚之漢安元年以光祿大夫

持節與侍中杜喬循行州郡考察風俗出宮埋車先奏太尉桓焉

司徒劉壽尸祿素餐不堪其職出城又奏司隸校尉趙峻河南尹

梁不疑汝南太守梁乾等贓污濁亂檻車送廷尉治罪天子以乾

梁冀叔父貶秩免峻等又奏魯相寇儀儀自殺威風大行郡縣莫

不肅懼還冀恨之出爲廣陵太守承叛亂後懷集撫卹甚有治化

在官十

當作

年卒子續尙書續弟方爲豫州牧子孫數世至大官

白虜狂僭亂離斯圯孝仲繫馬社稷是死

朱遵字孝仲武陽人

也公孫僭號遵為犍為郡功曹領軍拒戰於六水門衆少不敵乃
埋車輪絆馬必死為述所殺光武嘉之追贈復漢將軍郡縣為立

祠

建侯弔梁志効知己 趙敦字建侯武陽人也初為新都令德禮

宣流三司及大將軍梁冀累辟終不詣冀辟書不絕後冀自殺使
者監守不使人弔問敦獨往弔祭訖自拘有司天子赦之

叔通敦孝石生江汜 隗相字叔通棘道人也養母至孝母食欲

江中正江水相冬夏汲之一朝有橫石生正流中哀帝世為孝廉

平帝時為郎

吳生致養亦感靈祉 吳順字叔和棘道人也事母至孝赤烏巢

其門甘露降其戶察孝廉永昌太守

劉后初載實多良才季休忠亮經事能治 楊洪字季休武陽人

也先主領牧為部屬當作蜀部從事及征漢中丞相亮表為蜀郡太守

先主疾病永安召亮東行漢嘉太守黃元反後主用其計克元封

關內侯後為中郎將越騎尉按當作後為忠節將軍越騎校尉見三國志忠清公亮甚

信任之舊此下空十三行按當無所闕舊未必是也

德山耽學道以光時 伍梁字德山南安人也儒學雅尚州選迎

牧諸葛亮為功曹遷五官中郎將

烈武作合度曠塗夷惜哉公舉帥直陵遲 費詩字公舉南安人

也先主領牧為前部司馬羣臣勸先主稱尊號詩上疏曰殿下以

曹操父子逼主篡盜故乃羈旅萬里糾合士眾將以討賊今大敵

未尅而先自立恐人心疑惑昔高祖獲子嬰疑尚推讓況未出門

便欲自立耶以是左遷部永昌從事建興三年從丞相亮南征魏

將李鴻來降說魏新城太守孟達欲背魏向蜀亮方北面欲招達

為外援欲與書詩進曰孟達小子昔事振威不忠後事先帝背叛

反覆之人何足與書也亮嘿然詩終劉氏之世官位不盡其才君

子以昭烈之弘曠武侯之明達詩吐直言猶尙凌遲况庸主昏世率意直言而望肆効者哉

文然簡略言不詭隨

楊義當作義

字文然武陽人也輔漢將軍張

裔薦為丞相亮主簿大司馬蔣琬辟東曹掾歷二郡太守為射聲

校尉性簡略未曾以甘言加人酒後言笑多慢詞失大將軍姜維

意為維所廢延熙十八年作季漢輔臣讚在蜀書

車騎快快與國安危

張翼字伯恭文紀孫也以文武才幹歷征

西鎮南大將軍封亭侯延熙十八年與大將軍姜維西征大破魏

雍州刺史王經於狄道經衆死洮水者數萬人維欲進翼諫不可

必進無功時維屢出隴西翼常廷爭以為國小不宜黷武必為蛇

畫足不聽不得已每快快從行景耀元年遷左車騎將軍領冀州

刺史蜀平後死

猗猗衆偉芳烈名垂方德繹勳健之瓊瑰

總讚此二十一人也

述捷爲人士

進楊穆穆先姑是憲

進武陽楊氏女大匠廣漢王堂長子博妻

也博後母文有母儀之德進楊則其教爲行閨門雍穆梓柯太守

李禕家亦假係

當作繼

每不和嘆恨徒富貴學問不及博家也

陽姬請父厥族蒙援克諧內愛訓及秀彥

姬武陽人也生自寒

微父坐事閉獄楊渙始爲尙書郎告歸郡縣敬重之姬爲處女乃

邀道扣渙馬訟父罪言辭慷慨涕泣渙懇告郡縣爲出其父因奇

其才爲子文方聘之結婚大族二弟得仕宦遂世爲宦門後文方

爲漢中太守以趙宣爲賢將察孝廉函封未定病卒姬祕不發先

遣孝廉上道乃發喪宣得進用姬之力也後文方兄子伯邳爲司

隸校尉時姬長子穎伯冀州刺史仲子頰二千石伯邳以稟叔母

教迎在官舍每教伯邳政治伯邳欲舉茂材選有二人伯邳欲用

用老者嫌以其耄欲舉五方而其年幼以咨叔母勸舉方後趙宣

爲犍爲五方爲廣漢姬尙在故吏敬之四時承問不絕

周度割體貞節是全

周度棘道人也相登妻十九登亡中牟令

吳厚因人求之斷髮以誓志後人猶欲求之乃割其鼻養子早亡其妻左亦年十九遂俱守義世咸嘆婦姑之貞專其節操也

敬姬沈淵誠烈邈然

曹敬姬南安人也周紀之妻十七出適十

九紀亡遺生子元餘服闋父母以許孫賓給母病迎還知之自投水人赴之氣已絕一日一夜乃蘇息送依紀第居訓導元餘號爲學士年九十卒

貞玦玉操彌久彌刊

貞玦字瓊玉牛鞞程氏女張惟妻也十九

適惟未暮惟亡無子養兄子悅供養舅姑夙夜不怠資中王冲欲娶玦玦叔父肱荅以女志不可奪冲爲太守李巖督郵巖記縣遣孝義掾奉羔鴈宣太守命聘之玦乃自投水救援不死後太守蘇高爲立表太守蜀郡

舊校云闕

遣仁恕掾論曰貞玦太守章陵劉威又

爲作頌故稱述也

韓姜自財后旌其寃

韓姜棘道人尹仲讓妻也二十讓亡服除

資中董臺因從事王爲表弟求姜不許臺門生左習王蘇以爲姜可奪教姜家言母病迎還韓氏因逼成婚姜聞故自殺太守巴郡弓楊哀之殺習蘇以報姜死

謝姬引決同穴齊定

字誤未詳本或作突

姬南安人武陽儀成妻也成死

以己年壯無子將葬乃預作殯殮具毒藥須夫棺入墓拊棺吞藥而死遂同葬縣以表郡郡言州州上尚書天子咨嗟下書每大赦賜家帛四匹藁字誤未詳本或作蜀穀二石

媛姜匹婦勉夫濟子授命圜義踰國士

趙媛姜資中人盛道

妻也建安五年道坐過夫婦閉獄子翔方年五歲姜謂道曰官有常刑君不得已矣妾在復何益君門戶君可同翔亡命妾代君死可得繼君宗廟道依違數日姜苦言勸之遂解脫給衣糧使去代

為應對度走遠乃告吏殺之後遇赦父子得還道雖仕宦當世痛感終不更娶翔亦不仕耳末耳字衍文

黃帛求喪沈身中流靈精相感攜夫共浮黃帛棘道人張貞妻

也貞受易於韓子方去家三十里船覆死貞弟求喪經月不得帛

乃自往沒處躬訪不得遂自投水中大小驚睨積十四日持夫手

浮出時人為語曰符有先絡棘道帛求其夫天下無有其偶縣長

韓子冉嘉之召帛子幸之縣股肱

烈哉諸媛節稱義遵當作道讚此九女也

迷犍為列女

右犍為士女讚第四

凡三十人二十一人士九人女